

## Dill' wen dill' kob daa bzej Matewa'

*Dii xoxxto' Jesucrístona'*  
(Lc. 3:23-38)

<sup>1</sup> Dga cho'en dill' nan Jesucrístona' nake' xiin dia che dii Davina' na' dii Abrahama'.

<sup>2</sup> Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len ben' bisheeka'.

<sup>3</sup> Na' Judána' goke' xa Fáraza' len Zárana', na' xneeka' wlie' Tamar. Na' Fáraza' goke' xa Esróma', na' Esróma' goke' xa Arama'.

<sup>4</sup> Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'.

<sup>5</sup> Na' Salmónna' len Rahaba' gokgake' xaxna' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaína'.

<sup>6</sup> Na' Isaína' goke' xa Davina', na' Davina' goke' xa Salomónna'. Na' xna' Salomónna', beena' bikaa Davina', goke' xool dii Uríaza'.

<sup>7</sup> Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'.

<sup>8</sup> Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'.

<sup>9</sup> Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'.

10 Na' Ezequíaza' goke' x̄a Manaséza', na' Manaséza' goke' x̄a Amónna', na' Amónna' goke' x̄a Josíaza'.

11 Na' Josíaza' goke' x̄a Jeconíaza' len beñ' bisheeka', legaken' zoa kana' b̄che'byen beñ' Babilóniaka' beñ' Israelka' lalle'ka'.

12 Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' x̄a Zorobabela'.

13 Na' Zorobabela' goke' x̄a Abiuda', na' Abiuda' goke' x̄a Eliaquima', na' Eliaquima' goke' x̄a Azora'.

14 Na' Azora' goke' x̄a Sadoca', na' Sadoca' goke' x̄a Aquima', na' Aquima' goke' x̄a Eliuda'.

15 Na' Eliuda' goke' x̄a Eleazara', na' Eleazara' goke' x̄a Matánna', na' Matánna' goke' x̄a Jacoba'.

16 Na' Jacoba' goke' x̄a Joséna' beñ' che Maríana', x̄na' Jesúza', beena' lekzka' nsi'gake' Cristo.

17 Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka b̄che'byengake' beñ' Israelka' Babilóniana'. Na' wizak zi shda' diaka' bizzolon ka b̄che'byengake' legake' Babilóniana' axt ka wzoa Crístona', beena' bsel' Chioza' inabi'e.

### *Ka golj Jesúza'*

*(Lc. 2:1-7)*

18 Ki gok ka golj Jesucrístona': X̄nee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e.

19 Na' Joséna' beena' ba nakan ikeene', nake' to beñ' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i.

<sup>20</sup> Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e.

<sup>21</sup> Na' sane' to bi' byodo' na' wsi'ob' Jesús, la' leban' yislab' ben' yell cheb'ka' lao saaxya che'ka' kwenche bi kwiayi'gake'.

<sup>22</sup> Gok yog' diiki kwenche gok ka wna dii beena' wdixjee daa goll Chioza'ne', chi'e:

<sup>23</sup> To nool wew' wee, na' sane' to bi' byodo', na' wsi'gake'b' Emanuel.

Na' Emanuel zejin: Chioza' zoalene' cho'.

<sup>24</sup> Na' ka biban Joséna', bene' kon ka goll anjl che Xancho Chioza'ne' na' wkee Maríana'.

<sup>25</sup> Na' bi wdelle'ne' axt ki wxanche' bi'do'na', na' bsi'eb' Jesús.

## 2

### *Wyaj ben' sin'ka' jawiagake' Jesúza'*

<sup>1</sup> Jesúza' golje' yell Belénna', daa llia gana' mbani Judeana', kana' chnabia' Heródeza'. Na'ch bal ben' sin', ben' nsed che beljka', za'gake' ka de gana' chla'lə wbilla', blintegake' Jerusalénna'.

<sup>2</sup> Na' che'gake':

—¿Gani rey che ben' Israelka', bi'na' ba golj? Nezinto' ba goljb' la' ka de gana' chla'lə wbilla' ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

<sup>3</sup> Na' ka beni Heródeza' daa wnagake', gokshejlallee, na' lekzka' yog'lol ben' Jerusalénka'.

<sup>4</sup> Na'ch Heródeza' goxe' yog'lo<sub>l</sub> b̄xozka' ch̄nabia', na' beñ'ka' chli' chsedi ley che dii Moiséza', na' wñabile' legake' gan chiyal' galj Crístona', beena' wsel' Chioza' inabi'e.

<sup>5</sup> Na'ch gollgake'ne':

—Yell Belénna' daa mbani Judeanan' galje', la' kan' bzej to beñ' wdixjee daa goll Chioza' le', chi'e:

<sup>6</sup> Na' li', yell Belén llio' gani mbani Judeani, aga inacho nako' dii liizelozi bibi zakii ladj yellka' zakii llia Judeani;

la' lawo'ni ichej to beñ' inabi'e,

na' gap wwie' beñ' Israelka', beñ'ka' nak yell cha'.

<sup>7</sup> Na'ch Heródeza', ka kono gokbe'zi goxe' beñ' sin'ka' na' wñabile' legake' batyen'an ble'gakile' belja'.

<sup>8</sup> Na'ch bselee legake' Belénna' na' golle' legake':

—Li shaj, na' li lljadiljyoll bi'do'na', na' kat' yillelileb' na' yidnale nad' kwenche len' sha' llje'lawaab'.

<sup>9</sup> Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zejan xan yabana' llialon lawe'ka', na' ka bllinan gana' zoa bi'do'na', na' na'zə wzoan.

<sup>10</sup> Na' ka bizle'i beñ' sin'ka' belja', le bibagakile'.

<sup>11</sup> Na'ch ka wyoogake' loo yoona' ble'gakile' bi'do'na' len xna'b' Maríana'. Na'ch b̄chek' xibe'ka' na' be'la'ogake'b'. Na' wlejkake' or, na' yal zix, na' lekzka' len nill' che to yag dii chla' zix daa le mirra, na' be'gake'n cheb'.

<sup>12</sup> Ka biyoll be'la'ogake'b', Chioza' bsi'nile' legake' lo yel bishgal che'ka' kwenche bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

*Bxonjgake' wza'gake' Egíptona'*

13 Ka wde biza' beñ' sin'ka', to anjl che Xancho Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li shaj gana' mbani Egíptona'. Na' na'z soale axt kat'ch inia' li' yiza'le. La' Heródeza' yiyilje' bdo'na' kwenche wite'b'.

14 Na'ch lii wyaste Joséna' na' bchi'e bdo'na' len xna'baa, na' wal-lə wza'gake' zejlengake'b' gana' mbani Egíptona'.

15 Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to beñ' wdixjee daa golle'ne', kana' wne': “Nad' biñia' bi' cha'na' kwenche biza'b' gana' mbani Egíptona'.”

*Ben Heródeza' mandad witgake' bi'do'ka'*

16 Na' ka gokbe'i Heródeza' bi ben beñ' sin'ka' ka golle' legake', le blee. Na' bene' mandad witgake' yog'loł bi' byodo'ka' lle' yell Belénna' len yellka' ndil nllagan, bdo' cheenka' axt bi' chop yizi, bsakee ka to yizka' ba gok ble'i beñ' sin'ka' belja'.

17 Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

18 Kwe' wbell na' gakyeshii beñ'ka' lle' yella' le Ramá.

Noolka' nak xiin dia che dii Raquela' ni to kono cheengakile' gonxenlall' legake', daa wit bi'do' che'ka'.

19 Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

20 —Wyas, bi<sub>ch</sub>e' bi'do'na' len xna'baa na' li yiyaj gana' mbani Israela', la' ba wit be<sub>n</sub>'ka' cheengakile' witgake'b'.

21 Na'ch wyas Joséna' na' bi<sub>ch</sub>i'e bi'do'na' len xna'baa na' biyajgake' gana' mbani Israela'.

22 Na' ka wnezi Joséna' Arquelawa' ba chnabi'e lo laz dii xe' Heródeza', na' bllibe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'.

23 Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii be<sub>n</sub>'ka' wdixjee daa goll Chioza' legake' kani'yi che Jesúza', wngake' wsi'gake'ne' be<sub>n</sub>' Nazaret.

### 3

*Juanna', beena' bchoa be<sub>n</sub>' nisa'*

*(Mr. 1:1-8; Lc. 3:1-9, 15-17; Jn. 1:19-28)*

1 Na' do kana', Juan, beena' bchoa be<sub>n</sub>' nisa', wyaje' to latj gana' bibi chashj chleb gana' mbani Judeana', na' wdixje'ile' be<sub>n</sub>'ka' chdi'a chllag na',

2 chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

3 Na' dii Isaíaza', beena' wdixjee daa goll Chioza'ne', wne' che Juanna':

To be<sub>n</sub>' gosyee to lo latj ga bibi chashj chleb, na' in'e':

“Li se kwas wzenagle che Xanchona' na' wsalj yichjlall'do'leka' kat' zee.”

4 Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa.

<sup>5</sup> Na' beṇ'ka' lle' yell Jerusalénna', na' doxen gana' mbani Judeana' na' yellka' lia gaoz yao Jordánna' jazenaggake' dillaa cho'e.

<sup>6</sup> Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

<sup>7</sup> Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—iLe' naklikzle ka bel zṇia! ¿Achakile wak wxonjile' yeḷ' zak'zi' daa wsel' Chioza'?

<sup>8</sup> Li gon ka gakbe'i beṇ' nan dii li ba biyaj bile-nile.

<sup>9</sup> Na' bi gakzile bibi yeḷ' zak'zi' ile'ile daa inazle: “Neto' naknto' xiṇ dia che dii Abrahamama'.” Dii li nia' le', axt yajki wak gon Chioza' xiṇ dia che dii Abrahamama'.

<sup>10</sup> Yog'lol-le shi bi chonle ka chiyoolallii Chioza' na' gak chele ka chak che to yag dii chbia dii zix dii bi chak wen, na' lii chchogtegake' axt xanin na' chzal'gake'n lo yi'na'.

<sup>11</sup> Dii li nad' chchoa' le' nisa' daa chiyaj chilenile, per beena' zi' za' kollaana' napche' yeḷ' wak xench ka nad', na' ni bi zakaa gak' xmose' kwenche galj' xe'le'na'. Len' gone' ka yidsoa Espíritu Sántona' loo yichjlall'do'lena', ka le' chiyaj chilenile', na' beṇ'ka' bi chiyaj chileni wzalee legake' lo yi' gabi'la'.

<sup>12</sup> Na' gone' che beṇ' yell-lioni ka chon beena' nox' yag xozaa daa chpa'ile' trígona' na' kooshawee trígona' na' wzeye' beb cheyinna' lo yi'na' daa biga yiyolkzə.

*Jesúza' wchoe' nisa'*

*(Mr. 1:9-11; Lc. 3:21-22; Jn 1:31-34)*

<sup>13</sup> Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'.

<sup>14</sup> Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'lə za'zo' kwenche wchoa' li' nisa'.

<sup>15</sup> Per Jesúza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

<sup>16</sup> Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espíritu che Chioza' chetje' ka to palom na' jsoalene' le'.

<sup>17</sup> Na'ch bengakile' shii Chioza' zoa yabana' chi'e:

—Beenin nake' Xiin', beena' chakid', na' le chibaid' le'.

## 4

### *Goki dii xiwaa gonan ka wzenag Jesúza' cheyin (Mr. 1:12-13; Lc. 4:1-13)*

<sup>1</sup> Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

<sup>2</sup> Na' ka wde choa lla choa yel bibi wdawe', na' wdone'.

<sup>3</sup> Na'ch bllin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

<sup>4</sup> Na'ch goll Jesúza':



—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

<sup>5</sup> Na'ch dii xiwaa bche'n le' Jerusalenna' daa nak yell che Chioza' na' blean le' yichj yoodo'na' gana' nak sib wal.

<sup>6</sup> Na'ch gollan le':

—Shi leilo' nako' Xiin Chios, lla bixit'shki ni. La' Cho'a Xtill' Chioza' nan: Wselee anjl che'ka' gap wwiagake' li', na' gox'gake' li' kwenche ki koo wchewo' yajka'.

<sup>7</sup> Na' goll Jesúsza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

<sup>8</sup> Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'.

<sup>9</sup> Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

<sup>10</sup> Na'ch goll Jesúsza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

<sup>11</sup> Na'ch biza' dii xiwaa kwit Jesúsza' na' bllin bal anjlka' be'gake'ne' kon bi byalljile'.

*Wzolo Jesúsza' choe' cho'a xtill' Chioza' gana' mbani Galileana'*

*(Mr. 1:14-15; Lc. 4:14-15; 5:1-11; 6:17-19)*

<sup>12</sup> Ka beni Jesúsza' wloogake' Juanna' lillyana', bizee biyaje' gana' mbani Galileana'.

13 Na' bizee yell Nazareta' na' jazoe' yell Capernaúma', to yell xen dii llia cho'a nisdona' gana' mbani yell-lío che dia che dii Zabulónna' na' dii Neftalína'.

14 Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

15 Ka nak yell-lío daa naki che dia che dii Zabulónna' na' dii Neftalína',

daa llia shlaa yao Jordánna',  
gana' xoa nez daa zej cho'a nisdona'

daa llia gana' mbani Galileana',  
gana' lle' zan beŋ'ka' bi nak beŋ' Israel,

16 beŋ'ka' lle' na' gok yichjlall'do'eka' shgasj shchol,  
na' Chioza' ba bselee to beeni' xen lawe'ka'.

Lao beŋ'ka' lle' gana' chnabia' yel' wita'  
ba chzeeni' beeni' che Chioza'.

17 Na' wzolo Jesúza' chyixje'ile' beŋ' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

*Wlej Jesúza' tap beŋ' wxen bel kwenche gongake'ne'txen*

*(Mr. 1:16-20; Lc. 5:1-11)*

18 Na' ka zej Jesúza' cho'a nisdona' che Galileana' ble'ile' chop bish' beŋ' wxen bel chzal'gake' yixja' loo nisa' chzengake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés.

19 Na'ch Jesúza' chi'e legake':

—Li da, dino nad', na' kon ka chonle naa chbejle bel'ki loo nisi, ka'kzan gonle yibejle beŋ' lao dii mala'.

<sup>20</sup> Na' ka golle' legake' ka', lii bkwaan'tegake' yixj che'ka' na' zejlgake'ne'.

<sup>21</sup> Na' zi lat'chga wza'gake' bizle'i Jesúza' zi chop bish' ben', beena' to lie' Jacobo na' beena' sto lie' Juan, ben'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' belka'. Na' lekzka' goll Jesúza' Jacóbona' len Juanna' shajlgake'ne'.

<sup>22</sup> Na' lii bkwaan'tegake' barkwa' len xe'ka' na' janogake' Jesúza'.

*Jesúza' chli' chsedile' ben' zan*

*(Lc. 6:17-19)*

<sup>23</sup> Na' wda Jesúza' yog' yellka' llia doxen gana' mbani Galileana', chli' chsedile' ben' Israelka' gana' chdop chllaggake' choe'lwillgake' Chioza', cho'e dill' wen dill' kob che yel' wn'abia' che Chioza', na' biyone' yog' ben' che'i wde wdeli yillwe'.

<sup>24</sup> Na' doxen gana' mbani Síriana' wze dill' daa chon Jesúza', na' jwa'gake' yog'lol ben'ka' che'i wde wdeli yillwe', ben' chey chla, ben' yoo dii xiw', ben' chaz shon, na' ben' net ni'a nee. Na' Jesúza' biyone' legake'.

<sup>25</sup> Na' ben' zan inleeb jano le', ben'ka' lle' yellka' mbani Galileana' na' yellka' mbani Decápoliza', na' ben'ka' lle' yell Jerusalénna' na' yellka' sto mbani Judeana', na' ben'ka' lle' yellka' llia shlaa yao Jordánna'.

## 5

*Dill'ka' be' Jesúza' lo yaana'*

1 Ka ble'i Jesúza' beṅ' zan ba nogake'ne', na'ch wyepe' to lo yaa, na' wchi'e. Na'ch beṅ'ka' nakgake'ne' txen jabig'gake' kwite'na'.

2 Na' wzolo Jesúza' chli' chsedile' legake', chi'e:

*Beṅ'ka' zoa mbalaz*  
(Lc 6:20-23)

3 —Chakomba beṅ'ka' chakbe'gakile' chyalljgake' ile' gaklen Chioza' legake', la' legaken' yillingake' yabana' gana' chṅabia' Chioza'.

4 'Chakomba beṅ'ka' chbellyesh', la' Chioza' yizoe' legake' mbalaz.

5 'Chakomba beṅ'ka' nak beṅ' gaxjlall', la' wllin lla Chioza' wi'e legake' yell-lioni.

6 'Chakomba beṅ'ka' chzelall' gake' beṅ' li beṅ' shao', la' Chioza' ine' nakgake' beṅ' wen lawe'na'.

7 'Chakomba beṅ'ka' chiyeshii beṅ', la' ka'kzə yiyeshii Chioza' legake'.

8 'Chakomba beṅ'ka' nxi nyech yichjlall'do'eka', la' legaken' ile'gakile' Chioza'.

9 'Chakomba beṅ'ka' chon to dii byen soalen ljwellgake' mbalaz, la' ina beṅ' dii likzan nakgake' xiin Chios.

10 'Chakomba beṅ'ka' chiya dii chen chle'i daa chongake' ka cheeni Chioza', la' legaken' yillingake' gana' chṅabi'e.

11 'Chakomba le' kat' chiya dii na beṅ' chele na' chiya dii chongakile' le', na' kat'ka' chiyiljlall'gake' bittezə dill' wxiye' chele daa chonlilall'le nad'.

12 Li yiba yizaki, la' yabana' gape to dii wen dii shao'. La' ka chongakile' le' naa, ka'kzan bchi' bsak'gake' kani'yi dii beṅ'ka' wdixjee daa goll Chioza' legake'.

*Nakle ka zed' na' ka beeni'*  
(Mr. 9:50; Lc. 14:34-35)

<sup>13</sup> 'Len' nakle ka zedaa ladj beṅ' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj beṅ' len.

<sup>14</sup> 'Len' nakle ka to beeni' ladj beṅ' yell-lioki. To yell dii llia to lo yaa, zit'lə nla'n, na' bi ngashaan.

<sup>15</sup> Ni biga zoa to beṅ' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoona'.

<sup>16</sup> Ka'kzan le', li gon to dii byen gonle daa nak wen kwenche ile'i beṅ' na' we'la'ogake' Xacho Chioza' zoa yabana'.

*Jesúza' cho'e dill' che ley che dii Moiséza'*

<sup>17</sup> 'Bi gakzile bid' kwenche yikwas' ley daa bzej dii Moisézan' wa daa bli' bsemi dii beṅ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'lol ka na leya' na' daa bli' bsemi beṅ'ka' wdixjee daa goll Chioza' legake'.

<sup>18</sup> Dii li nia' le', shlak biṅ' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'lol daa bllie' bia' gak.

<sup>19</sup> Daan, nottezə beṅ' chyishje' to daa nllia Chioza' bia' goncho, la'kzi dii bi lliatotek, na' shi wliile' beṅ' yoblə gone' ka chone', bitek bi zakee yabana' gana' chṅabia' Chioza'. San beena' gon daa nllia Chioza' bia' goncho na' wliile' beṅ' yoblə gone'n, beenan' gake' to beṅ' zakii yabana' gana' chṅabia' Chioza'.

<sup>20</sup> Na' nia' le', aga wak yillinle gana' zoa Chioza' chṅabi'e shi toz ka chonlenle fariseoka' na' beṅ'ka'

chli' chsedi leya', chiyal' wzenagchle che Chioza' aga ka legake'.

*Bi chiyal' wito ben'*

(Lc. 12:57-59)

<sup>21</sup> Na' lekzka' che' Jesúza' legake':

—Nezkzile goll dii Moiséza' dii xoxto'choka': “Bi chiyal' wito' ben'. La' beena' wit to ben' chiyal' guete' daa bene' ka'.”

<sup>22</sup> Per nad' nia' le', nottez beena' chlee bish' ljwelle'na' chidolee tie' lo yel' zak'zi'na'. Na' lekzka' beena' chzoazi'yee bish' ljwelle'na', ben'ka' chnabia' chiyal' wwiagake' nak gongake' che'; na' beena' chnie' bish' ljwelle'na' dill' zibia', chidolee wzal' Chioza' le' lo yi' gabila'.

<sup>23</sup> 'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li',

<sup>24</sup> na'z bkwaan daa noxoo, zigaate chiyal' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

<sup>25</sup> 'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'.

<sup>26</sup> Dii li nia' li', aga wibeje' li' lillyana' axt ki chixjo' doxen daa chiyal' chixjo'.

*Bi chiyal' inelen ljwell ben'*

<sup>27</sup> 'Nezkzile wna dii Moiséza': “Bi chiyal' ineleno' nool bi nak nool cho'.”

<sup>28</sup> San nad' nia' le', nottez beena' chwia to noolə na' chza'lalleene' loo yichjlall'do'ena', daa chone'

ka' ba benkze' ka chon beena' zoate xoole'na' na' chnelene' nool yoblə.

<sup>29</sup> 'Shi jalawo' de shlina' chonan ka gono' dii mala', naklan wen wtoljo'n na' choono'n. La' wenchan soa tlaaz jalawo'na' aga ka daa yiyaj doxentio' lo yi' gabila'.

<sup>30</sup> Na' shi noo de shlina' chonan ka gono' dii mala', naklan wen wchogo'n na' choono'n, la' wenchan soa tlaaz noona' aga ka daa yiyaj doxentio' lo yi' gabila'.

*Bi nakan wen yilaa be'ka' nshagna'*

(Mt. 19:9; Mr. 10:11-12; Lc. 16:18)

<sup>31</sup> 'Nezkzile wna dii Moiséza': "Nottez beena' yilaa nool che'na' chiyal' chas to yish we'n dill' nan bilaagake'."

<sup>32</sup> San nad' nia' le' shi to be' byo yilee xoole'na' la'kzi xoole'na' bi chnelene' be' yoblə, daa yileene' chone' ka yikaa noola' be' yoblə na' gake' ka to noolə zoalentie' be' che'na' na' chnelene' be' yoblə. Na' beena' yikee noola' nlaa be' che'na', lekzka' chone' ka chon beena' chnelen xool be' yoblə.

*Bibi wzoacho de taschiw kat' bin wchebcho*

<sup>33</sup> 'Lekzka' nezkzile golle' dii xozxto'leka': "Bi wkwaaanzo' ka'zə daa ba bchebo' lao Xancho Chioza' shi bzoatio' bi bzo' de taschiw."

<sup>34</sup> San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'.

<sup>35</sup> Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lennan' yell che beena' chnabia' doxen.

<sup>36</sup> Na' ni bi wzoazle yichjlēna' de taschiw, la' aga wak gonle ka yiyak ni to yish' yichjlēna' yish' bez' shi nakan dii gasj wa gonle ka yiyakan dii gasj shi nakan yish' bez'.

<sup>37</sup> San kon inale “wakan” wa inale “bi gakan”, la' shi chzoale de taschiw bichlə wa nochlə, dii malan' chonan chonle ka'.

*Chiyal' gakicho ben'*  
(Lc. 6:29-30)

<sup>38</sup> 'Lekzka' nezczile' wna dii Moiséza': “Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'.”

<sup>39</sup> San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa.

<sup>40</sup> Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'.

<sup>41</sup> Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro.

<sup>42</sup> Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

*Chiyal' gakicho ben'ka' chakzbangakile' cho'*  
(Lc. 6:27-28, 32-36)

<sup>43</sup> 'Na' lekzka' nezile w nagake': “Goki bish' ljwello'na' na' bwiyi ben'ka' chakzi' chakzbangakile' li'.”

<sup>44</sup> San nad' nia' le': Li gaki ben'ka' chakzbangakile' le', li inabi Chioza' gak wen che ben'ka' chsak'zi'gake' le'.

<sup>45</sup> Shi gonle ka', na'ch inēzi ben' nakle xiin Xacho Chioza', beena' zoa yabana'. La' le' chone' ka chla'



wbilla' lao beṅ' mal na' lao beṅ' wen, na' chone' ka chak yeja' lao beṅ' chon wen na' lao beṅ' chon mal.

<sup>46</sup> Na' shi to beṅ'ka' nllagzile chakile, aga bi zjanayin, la' ka'klen chon beṅ' wiçhixjka' beṅ'ka' chakile le beṅ' mal nakgake'.

<sup>47</sup> Na' shi to beṅ'ka' nllagzile chwaple chiox, çgaran de dii wenna' chonle? La' ka'klen chon beṅ'ka' bi nombia'gake' Chioza'.

<sup>48</sup> Li gak dowalj beṅ' li beṅ' shao' ka nak Xacho Chioza' zoa yabana', nake' dowalj beṅ' li beṅ' shao'.

## 6

### *Chiyal' gaklencho beṅ'*

<sup>1</sup> 'Bi wli' wzez chele ladj beṅ' nan nakle beṅ' wen. La' shi kwençhezə ile'i benaan chonle daa nak wen, bibi laxjle goṅ Xacho Chioza', beena' zoa yabana'.

<sup>2</sup> Na' kat' chaklenle beṅ'ka' chyallj chçhini, bi wzelen dill', ka chon beṅ' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwenche we'la'o beṅ' legake'. Dii li nia' le', daa choe'la'o beṅ' legake', lennan' laxje'ka'.

<sup>3</sup> San le', kat' choe'le beṅ' bi dii choe'lene', bi gonlen ka ile'i beṅ'. Na' ni to beṅ' bi ye'lene' bin chonle.

<sup>4</sup> San li gaklen beṅ' ka kono gakbe'i. Na' Xachona', beena' chen chle'i daa chonle, gone' laxjle.

*Ka chiyal' we'lwillcho Chioza'  
(Lc. 11:2-4)*

5 'Na' kat' choe'lwill-le Chioza', bi gonle ka ben' wxiye'ka'. Legake' choollall'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' ben' kwenche ile'gakile' ka chongake'. Dii li nia' le', daa chle'i ben' ka chongake', lezannan' laxje'ka'.

6 San le', kat' we'lwill-le Chioza', li yiyoo loo lill-lena' na' li wsej puerta', na' li we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

7 'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chak-gakile' daa choe'gake' dill' zan na' wzenague' bin che'gake'ne'.

8 Bi gonle ka chongake', la' Xacho Chioza' ba nezczile' bi daa chyalljile ka zi inablalen.

9 Kat' we'lwill-le Chioza', kin inale:

Xanto' Chios, ben' zoa yaba,  
we'la'oshga yog'lol ben' li'.

10 Na' inabia'gacho' loo yichjlall'do' yog'lol ben',  
kwenche gak lo yell-lioni ka chaklalloo, ka chak yabana'.

11 Ka nak daa chono' cheej chaonto' yog' lla,  
benqachan naanlla.

12 Wxi'xen chento', ka chon neto' chzi'xennto' bit-teza dii choni ben' neto'.

13 Bi we'gacho' latj ibixnto' gonnto' daa bi nak wen,  
san bislagach neto' lo ni'a na' dii mala'.

La' lin' napo' yel' wñabia', na' yel' wak, na' lin' chidoloo shoo balaan xen zejli kan. Kan' nakan.

14 'La' shi le' chzi'xenle che ben' shi bi chongak-ile' le', ka'kzə Xacho Chioza' zoa yabana' si'xene' chele.

15 San shi le' bi chzi'xen che ljuwell-le, ka'kzə Chioza', beena' nak Xale, bi si'xene' dii malka' chonle.

*Daa chiya! goncho kat' zoacho wbas'*

16 'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon cho'alawe'ka' nyesh' kwenche gakbe'i ben' bi neej naogake'. Dii li nia' le', daa gakbe'i ben' daa chongake', lezannan' laxje'ka'.

17 San le', kat' soale wbas', li wpaa yichjlana' na' li chib li wxis cho'alaolena'

18 kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

*Yel' shawaa daa de yabana'*

*(Lc. 12:33-34)*

19 'Bi wtop wshagle yel' wni'ana' yell-lioni, la' bal diika' chaljan baka' chlliyi'gakban, na' balan chibia leyin na' chbiayi'gakan, wa choo wbanka' na' chkaagake'n.

20 San li gon ka gat' yel' shao' chele yabana', la' daa de yabana' bi galjan bado' wlliyi'ban, ni bi yibia leyin, ni bi gak sho' wbanna' ikeen.

21 La' gana' de yel' shao' chelena', na'kzan se yichjlall'do'lena' wneyi.

*Jalaochoki nakgakan beeni' che kwerp chechoni*

*(Lc. 11:34-36)*

22 'Jalaochoki nakgakan beeni' che kwerp chechoni. Shi jalaochoki chle'gakin kwaslo<sub>l</sub>, doxen kwerp chechoni zoan lo beeni'na'.

23 Per shi bi chle'i jalaochoki, kwerp chechoni zoan lo yel cho<sub>l</sub>a'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

*Aga wak goncho yel' wni'ana' txen na' lezkka' gontecho Chioza' txen*  
(Lc. 16:13)

24 'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj in<sub>l</sub>abia' yel' wni'ana' cho'.

*Bi kwek yichjcho diika' chyalljicho*  
(Lc. 12:22-31)

25 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techle yel' mban chechona' aga ka daa cheej chaocho, na' zak'tech kwerp chechona' aga ka xalaanchona'.

26 Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə?

27 Na' ni tole bi gak yischooch yel' mban chelena' zi shloll la'kzi nall inleeb ze le wneyi cheyin.

28 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do.

29 Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'.

30 Na' shi Chioza' none' yejdo'ka' ze lyixaa xochi, la'kzi nakan de toldezə na'tech chtop ben' len na' chzeye'n, ¿alechla le', gontechle' wen chele gone' xalaanle la'kzi bitek chajle'le gaklene' le'?

31 Na' bi kwek yichjzle inazle: “¿Bin yeej gaocho?” wa “¿Nak goncho gat' xalaancho?”

32 La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezczile' chyaljile yog' diiki.

33 Na' daa lliarote chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyaljile.

34 Bitek kwek yichjle shi wyaj wdele llaka' zi za' la' to to lla nsa' dii zed cheyin.

## 7

### *Bi chiyal' yiya yiyiljcho ben'*

*(Lc. 6:37-38, 41-42)*

1 'Bi yiya yiyiljle ben', kwenche bi yiya yiyilj Chioza' le'.

2 La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'.

3 ¿Biche chwiazoo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'?

4 Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': “Benshki yibej' bicha' yoo loo jalawo'na'”?

5 ꞑBen' wxiye! Zigaate bwia cho'na' na'tech wwio' che bish' ljwello'na'.

6 'Na' bi gonzle byen we'lenle xtil' Chioza' ben'ka' bi chazlall'gake'n, kwenche ki gongak-ile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtil' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choollall'gakb gaogakb.

*Chiyal' inabicho Chioza' gaklene' cho'  
(Lc. 11:9-13; 6:31)*

7 'Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n.

8 'La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljkgake' sho'e.

9 'Le' zoa xiinle, shi inabib' le' to yetxtil aga we'leb' to yaj.

10 Wa shi inabib' le' to bel yaa, aga we'leb' to bel znia.

11 Shi le' naktele ben' mal chak we'le xiinleka' daa nak dii wen, ꞑalechli Xacho Chioza' zoa yabana' ki gone' le' dii wen dii shawaa shi inabilene'n?

12 'Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

*Puert daa nak diido' yid  
(Lc. 13:24)*

13 'Li gon byen sho'le cho'a puerta' daa nshop'.  
La' nlag' puerta' na' zlag' nak neza' daa zej gana'  
chbiayi' ben', na' ben' zan choogake'n.

14 Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

*Daa chbia lo yaga' chli'n bi yag daa*

*(Lc. 6:43-44)*

15 'Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chliayi'gake' ben', ka chon to ba znia.

16 Ka ile'ile ka nsa' chegake' na' gakbe'ile non nakgake'. La' nezczile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa.

17 Ka'kzan yag wenna' chbian dii wen, na' yaga' daa bi nak wen chbian dii bi nak wen.

18 La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen.

19 Yog' yag dii chbia dii bi nak wen, chchoggake'n na' chzeygake'n.

20 Daan, wakbe'kzile ka nsa' che ben'ka'.

*Aga yog' ben' yilline' yabana' gana' zoa Chioza' chnabi'e*

*(Lc. 13:25-27)*

21 'Aga yog' ben'ka' na nad': "Xan', Xan'", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'.

22 Kat'ka' illin llana' yizia' kwent che ben', zangake' inagake' nad': "Xan', Xan', neto' wdixjeento' daa wno', na' kon yel' wak cho'na' bibejnto' dii xiw'ka' yoo ben' na' bennto' dii zan yel' wak."

23 Na'ch yepgakee: "Biga bembia' le'. Li kwas ka'lə, le' ben' wen dii mal."

### *Chop ben' bengake' twejyoo*

*(Lc. 6:47-49; Mr. 1:22)*

24 'Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj.

25 Na' ka gok yejsiwaa, bgol yaoka', na' wzechga be'na' nan wllig'gakan yoona', per bi billeen daa chi'cha leninna' lo yaja'.

26 Per beena' cheni cho'a xtilaani na' bi chone' ka nia', nake' ka beena' bi chajonii, beena' bxe lille'na' lo yoxa'.

27 Na' ka gok yejsiwaa, bgol yaoka', na' wzechga be'na' na' bllig'gakan yoona' na' wlliyi'tekzan.

28 Na' ka biyoll be' Jesúza' dillii, bibani ben'ka' ka chli' chsedile',

29 daa bli' bsdile' legake' lega ben' za'len yel' wnabia', aga ka chli' chsedi ben'ka' chzajonii legake' leya'.

## 8

### *Jesúza' biyone' to ben' che'i léprana'*

*(Mr. 1:40-45; Lc. 5:12-16)*

1 Na' ka biyetj Jesúza' lo yaana', ben' zan zino-gake'ne'.

2 Na' kwite'na' bllin to ben' che'ile' lepra', na'ch bchek' xibe' lawe'na', chi'ene':



—Xan', nezid' wak yikwaso' yillwe'ni chak' shel' gueenilo'.

<sup>3</sup> Na'ch Jesúza' bxōa neena' yichje'na', chi'ene':

—Cheenid'x. Na' naate yikwasa'n.

Na' kon ka golle' ka', lii biyakteyi beena'.

<sup>4</sup> Na'ch che' Jesúza'ne':

—Ni to kono yoo ka nak daa ba ben' cho'.  
Lete wyaj lao bxōza' kwenche ile'ile' ba biyakilo',  
na' jwa' daa chiya'l' lljoo lao Chioza' ka nllia dii  
Moiséza' bia' goncho kwenche inēzi beṅ' ba biyak-  
ilo'.

*Biyon Jesúza' xmos xan soldadka'*

*(Lc. 7:1-10)*

<sup>5</sup> Ka billin Jesúza' yell Capernaúma' lii bllinte to xan soldad lawe'na', na' got'yoile'ne',

<sup>6</sup> chi'ene':

—Xan', xmosaa die' lillaa, na' net tlaa kwerp che'na' na' le chey chle'.

<sup>7</sup> Na'ch che' Jesúza'ne':

—Na' sa' yiyonee.

<sup>8</sup> Na' che' xan soldadka'ne':

—Xan', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'.

<sup>9</sup> Nia' ka' la' zoa beṅ' chṅabia' nad', na' nad' lekzka' chṅabia' soldad cha'ka'. Kat' chep' toe': “Wyaj ni”, na' chaje'; na' kat' chep' stoe': “Da ni”, na' chide'; na' kat' chizep' xmosaa: “Ben dga”, na' chone'n.

<sup>10</sup> Ka beni Jesúza' cho'a xtilleena', bibanile' na' chi'e beṅ'ka' nogake' le':

—Dii li nia' le', bigaṅ' lljtia' to beṅ' Israel beṅ' gonlilallee nad' ka chonlilall' beeni nad'.

<sup>11</sup> Na' nad' nia' le', beṅ' zan beṅ' zaak doxen yell-lioni gonlilall' gake' nad' na' lljazoalengake' txen dii

Abrahama', dii Isaaca' na' dii Jacoba' yabana' gana' chñabia' Chioza'.

<sup>12</sup> Na' ka nak ben'ka' wlej Chioza' nan lljazoagake' gana' chñabi'e, zane' wzalee gana' shgasj shçhol, gana' kwellyesh'gake' na' gaoyaaḅaxj leye'ka' daa le gakshejlall'gake', daa bi goongakile' inabi'e legake'.

<sup>13</sup> Na'ch che' Jesúza' ḅan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

*Biyon Jesúza' tobiin che Pédrona'*

*(Mr. 1:29-31; Lc. 4:38-39)*

<sup>14</sup> Na'ch wyaj Jesúza' lill Pédrona', na' ble'ile' de tobiin che'na' yo'e dii lana'.

<sup>15</sup> Na' beḅ' Jesúza' neena' na' bicheje' dii lana'. Na' lii wyastie' bene' dii wdaogake'.

*Jesúza' biyone' zan ben'ka' bi shao'*

*(Mr. 1:32-34; Lc. 4:40-41)*

<sup>16</sup> Na'ch ka ba chxoa whilla', jwa'gake' ben' zan gana' zoa Jesúza', ben' yoo dii xiw'ka', na' sh-cho'azə dillaa bi'e bichejgakan. Na' lekzka' biyone' yog' ben' bi shao'.

<sup>17</sup> Gok ka' kwenche gok ka wna dii Isaíaza', beena' wdixjee daa goll Chioza'ne', daa wne': “Le' bikee yillwe'ka' che'icho na' bene' ka bigaa yel' chey chla chechona'.”

*Ben'ka' cheengakile' lljanogake' Jesúza'*

*(Lc. 9:57-62)*

<sup>18</sup> Na' ka ble'i Jesúza' ben' zan inleeb ba nechjgake'ne', bene' mandad telene' ben'ka' nakgake'ne' txen shlaa nisdona'lə.

19 Na' wbig' to beṅ' chli' chsedi leya', chi'ene':

—Maestro, cheenid' sa'len' li' gattezə shajo'.

20 Na'ch che' Jesúza'ne':

—Bez'ka' nongakb yech ga chiyoogakb, na' byiṅdo'ka' non lilldo'gakb, san nad', Beṅ' Bsel' Chioza' Yell-lioni, bibi lill' de.

21 Na' bchej sto beṅ' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

22 Na'ch goll Jesúza'ne':

—Da, dino nad'. Wikwash'kzə ljwell beṅ' wetka'.

*Jesúza' bkweze' be'na' lo nido'na'*

*(Mr. 4:35-41; Lc. 8:22-25)*

23 Na'ch wyoo Jesúza' loo barkwa' len beṅ'ka' ba nakgake'ne' txen.

24 Na' shlak zej barkwa' wtese'. Na' wzolo wzechga be'na' lo nido'na', na' wzolo chas chataan na' biyoll nisa' loo barkwa'.

25 Na'ch beṅ'ka' nak Jesúza' txen jasangake'ne', na' che'gake':

—iXan', bisla cho'! iBa chbe'cho yel!

26 Na'ch che' Jesúza':

—iBerache chleblizle? iBiḱe bi nḱenilall'le nad' kwasol?

Na'ch wyase' bsheshlene' be'na' len nido'na', na' wlezkakan.

27 Na' beṅ'ka' lle'len Jesúza' loo barkwa' biban-gakile' ka bene', na'ch che' ljwellgake':

—iNoran nak beeni, lla? Axt be'na' na' nido'na' chzenaggakan che'.

*Chop ben' Gadara yoogake' dii xiwaa*  
(Mr. 5:1-20; Lc. 8:26-39)

<sup>28</sup> Na' ka bllin Jesúza' yell-liona' mbani Gadárana' daa lla shlaa niso'da', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'.

<sup>29</sup> Na' besyaagakan che'gakan Jesúza':

—¿Biche za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

<sup>30</sup> Na' gaoz lle' ba zan kush chaogakb.

<sup>31</sup> Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjlall'do' ben'ki, we'gacho' latj yiyoonto' kushka'.

<sup>32</sup> Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo niso'da' na' wche'gakb yel.

<sup>33</sup> Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'.

<sup>34</sup> Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

## 9

*Jesúza' biyone' to ben' net tlaa kwerp che'na'*  
(Mr. 2:1-12; Lc. 5:17-26)

<sup>1</sup> Na' biyoo Jesúza' to loo barkw, na'ch bilag'gake' shlaa niso'da' na' billine' yell che'na' gana' wzee.

<sup>2</sup> Na' bllinlengake' to beṇ' net ṇi'a neena' lawe'na', n̄xoagake'ne' to lo daa. Na' gokbe'i Jesúza' le nonlilall'gake'ne', na'ch golle' beṇ' we'na': —Btiplaloo, xiin', ba biyakxen xtoḷoona'.

<sup>3</sup> Na'ch baḷ beṇ'ka' chli' chsedi leya' che' ljuwell-gake': “Ba chonz kwin beeni ka Chioza' daa ne' ka'.”

<sup>4</sup> Na' gokbe'i Jesúza' daa wza'lall'gake', na' chi'e legake':

—¿Biche chza'lall'zle ka'?

<sup>5</sup> ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yeppee: “Biyas na' bigoo nez”?

<sup>6</sup> Na' wliid' le', nad', Beṇ' Bsel' Chioza', nap' yel' wṇabia' yell-lioni kwenche yizi'xen' saaxya che beṇ'.

Na'ch golle' beena' net ṇi'a neena':

—Biyas, bitob daa cho'na', na' biyaj lillo'na'.

<sup>7</sup> Na'ch biyas beena' net ṇi'a neena' na' ziyaje' lille'na'.

<sup>8</sup> Na' ka ble'i beṇ'ka' ka gok, bibangakile', na' be'la'ogake' Chioza' daa bi'e yel' wak xenna' to beṇ' yell-lío.

*Wlej Jesúza' Matewa' kwenche gone'ne' txen  
(Mr. 2:13-17; Lc. 5:27-32)*

<sup>9</sup> Ka biza' Jesúza' na', ble'ile' to beṇ' wiçhixj, lie' Mateo, chi'e gana' chçhixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

<sup>10</sup> Na' shlak chi' Jesúza' lill Matewa', bllin beṇ' zan wiçhixjka' na' zan beṇ' zeyi çheyi bi nsa' çhegake' wen, wche'gake' cho'a mesa' wdaolengake' Jesúza' len beṇ'ka' nakgake'ne' txen.

11 Na'ch ka ble'i fariseoka' chaolen Jesúza' beŋ'ka', na'ch wŋabgakile' beŋ'ka' nakgake'ne' txen, che'gake':

—¿Bi che chaolenz maestro cheleni beŋ' wixhixjki len beŋ'ki bi nsa' cheyin wen?

12 Na'beni Jesúza' daa goll fariseoka', na'ch chi'e legake':

—Aga beŋ'ka' shawaan chyalljgakile' wen rmecha' san beŋ'ka' bi shawaan chyalljgakile'ne'.

13 Li yiyaj na' li lljased bin zeji Cho'a Xtill' Chioza' gana' nan: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” Aga bid' ni che beŋ'ka' nak beŋ' li beŋ' shao', san bid' ni che beŋ' saaxyaka'.

*Wŋabgakile' Jesúza' bi che bi chzoa beŋ'ka' nakgake'ne' txen wbas'*

*(Mr. 2:18-22; Lc. 5:33-39)*

14 Na'ch beŋ'ka' nak Juanna' txen jabig'gake' kwit Jesúza' na' wŋabgakile'ne' che'gake':

—Neto' na' fariseoka' zeyi chento' chzoanto' wbas'. Na' ¿bi che beŋ'ka' nakgake' li' txen bi chzoa-gake' wbas'?

15 Na'ch che' Jesúza' legake':

—Kat' chak to wishagna' beŋ'ka' chdi'a chllag lill beŋ' byona' aga chdagake' nyesh', san cheej chaogake'. Na' ka'kzan beŋ'ki nakgake' nad' txen, cheej chaogake' naa zoalen' legake', per wllin lla wkwas beŋ' nad' kwite'ka', kana'chan soagake' wbasaa.

16 'Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nlllo' gakchan dii xench.

17 Na' aga no chгаа vino daa zi' bchejte loo yid gola', la' wchez' yid gola' na' la<sub>ljə</sub> vinona', na' ka vinona' ka yida' kwiayi'gakan. San chiyal' shall vino daa zi' bchejte loo yid koba' kwenche ni ton bi kwiayi'.

*Jesúza' biyone' xiin Jairona' len noola' jexee xe'na' (Mr. 5:21-43; Lc. 8:40-56)*

18 Na' ni choe'te Jesúza' dill', ka bllin to be<sub>n</sub>' w<sub>n</sub>abia' na' b<sub>ch</sub>ek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' w<sub>x</sub>oa noona'b' na' yibam'.

19 Na'ch lii wzolla'te Jesúza' zejlene' be<sub>n</sub>'ka' nakgake'ne' txen lill be<sub>n</sub>' w<sub>n</sub>abia'na'.

20 Na' ka zejgake' lill be<sub>n</sub>' w<sub>n</sub>abia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' be<sub>x</sub>ee xe'na',

21 la' chakile': “Kon shel' ba be<sub>x</sub>aa xe'na' wiyakkzid'.”

22 Na' biye<sub>ch</sub>j Jesúza' na' ka ble'ile' noola' chi'ene':

—Btiplaloo, xiin', ba biyakilo' daa chon<sub>l</sub>ilaloo nad'.

Na' lii biyakteyi noola'.

23 Na' ka bllin Jesúza' lill be<sub>n</sub>' w<sub>n</sub>abia'na' ba lle' be<sub>n</sub>'ka' chkwel' bllaja' na' be<sub>n</sub>' zan ba chosyaa-gake' chbellgake'.

24 Na'ch che' Jesúza' be<sub>n</sub>'ka':

—Li yillesh ni. Aga witba'n san cheszbaan.

Per bxill-ligake'ne'.

25 Na' ben Jesúza' byen billeshgake', na' wyo'e na' be<sub>x</sub>ee na' bi' nool weta' na' lii biyasteb'.

26 Na' yog' yellka' llia gaoz wze dill' daa bene'.

*Biyon Jesúza' chop ben' lchol*

27 Na' ka biza' Jesúza', chop ben' lchol janogake'ne'. Na' chosyaagake' zilljə che'gake':

—¡Biyesh'lall'gachi neto', xiin dia che dii Daví!

28 Ka biyoo Jesúza' loo yooná', ben' lcholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll ben' lcholka'ne':

—Awe, Xannto', wak gono' ka ile'into'.

29 Na'ch bex' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

30 Na'ch bile'gakile'. Na' Jesúza' golle' legake':

—Li gon byen kono ye'le ka'.

31 Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

*Biyon Jesúza' to ben' bi chak ine*

32 Shlak chiza' ben'ka' gok ben' lchol, bllin ben' yoblə lao Jesúza' nche'gake' to ben' bi chak ine daa yo'e dii xiwaa.

33 Na' kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin bin' ile'icho yell Israeli to yel' wak ka dga ba ben beeni.

34 Per fariseoka' che'gake':

—Beeni chibeje' dii xiw'ka' kon yel' wak che daa chnabia' legakan.

*Chyallj ben' zan gongake' xshin Chioza'*

35 Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag ben' Israelka' choe'lwillgake' Chioza'. Wdixje'ile' legake'



dill' wen dill' kob che yel' wñabia' che Chioza' na' biyone' beñ' che'i bittezə yillwe'.

<sup>36</sup> Na' ble'i Jesúza' beñ' zan zejlengake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa.

<sup>37</sup> Na'ch golle' beñ'ka' nakgake'ne' txen:

—Dii li nia' le', beñ'ka' zi' gonlilall'gake' Chioza' zaklebgakile' to dii wliachga to lo yell-lío, na' chyalj no yizi' yilapan, per to chopchga wen llinka' zoa.

<sup>38</sup> Na' li inabi Xancho Chioza' wzanche' beñ'ka' wtopgake' beñ'ka' gonlilall'gake'ne'.

## 10

*Jesúza' wleje' shllin beñ'ka' gakgake' postl che'*  
(Mr. 3:13-19; Lc. 6:12-16)

<sup>1</sup> Na'ch biti'a Jesúza' beñ'ka' shllin wleje' na' bi'e legake' yel' wñabia' kwenche gak yibejgake' dii xiw'ka' yoo beñ', na' yiyongake' beñ' che'i bittezə yillwe'.

<sup>2</sup> Na' kin le postlka' shllin: zigaate wleje' Simónna', beena' lekzka' che'gake' Pedro, len beñ' bishee Andréza', na'tech Jacóbona' len beñ' bishee Juanna', beñ'ka' nak xiin Zebedewa',

<sup>3</sup> na'ch Felípena', Bartoloména', Tomáza', Mateo, beñ' wíchixja', Jacobo xiin Alfewa', Tadewa',

<sup>4</sup> Simón, beena' bsi'gake' Zelote, na' Jud Scariota', beena' bene' Jesúza' lo na' beñ' malka'.

*Bsel' Jesúza' postlka' shllin je'gake' cho'a xtil'*  
*Chioza'*  
(Mr. 6:7-13; Lc. 9:1-6)

5 Na'ch bsel' Jesúza' ben'ka' shllin je'gake' cho'a xtill' Chioza', na' chi'e legake':

—Bi shajle yellka' gana' zoa ben'ka' bi nak ben' Israel, ni bi shajle yellka' llia gana' mbani Samáriana'.

6 San li shaj gana' lle' ben' Israelka', ben'ka' nak ka xil' ba wnit.

7 Li shaj li lljtixjee ba zoa gaoshosh inabia' Chioza' beena' zoa yabana' loo yichjlall'do' ben'.

8 Li yiyon ben'ka' bi shao' na' ben'ka' che' i lepra, li yisban ben' ba wit, na' li yibej dii xiw'ka' yoo ben'. Na' ka ben' Chioza', bene' le' yel' waka' ka'z, ka'kzan le' bibi wchixjle yiyonle ben'.

9 'Na' bi wa'le mech de or, de plat ni de cobre.

10 Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

11 'Na' kat' illinle to to yell xen wa yelldo'zə, chiljle to ben' nsa' che' wen, na' yigaanle lille'na' na' na'tezə soale axt ka illinch lla yiza'le.

12 Na' ka sho'le lille'na' ye'lene': "Chioza' wzoe' le' mbalaz."

13 Na' shi dii li ben'ka' lle' na' nakgake' ben' wen, wakkzə daa ye'le legake'; san shi bi nakgake' ben' wen, na' aga wakan.

14 Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' llia ni'aleka'.

15 Dii li nia' le', kat' illin lla wchoglo Chioza' che ben', yel' zak'zi' xench ile'chi ben' yellka' gana' gongakile' le' ka' aga ka ben' yell Sodómana' na' yell Gomórrana'.

*Yel' zak'zi'ka' yen ile'i ben'ka' nak Jesucristona' txen*

16 'Nad' chselaa le' ka xildo' ladj ba zniaka'. Na' chiyal' gakle ben' sin' na' ben' wen.

17 Wsak'gale, la' wchej ben' lljwee le' lao ben'ka' chnabia' na' wit chingake' le' gana' chdop chllagcho choe'lwilcho Chioza'.

18 Na' lljwa'gake' le' lao ben' wnabia' xenka' daa chonlilall'le nad', na' ka' gak we'lenle legake' cho'a xtilaana' na' ka'kzə ben'ka' bi nakgake' ben' Israel.

19 Na' kat' gongake' le' lo na' ben'ka', bi sele wneyi naklə inale wa bi inale, la' ka gal' inele, Chioza' wxoe' dillaa cho'a loll'leka'.

20 La' aga len' inele, san Espíritu che Xacho Chiozan' gone' ka inele.

21 'Beena' zoa ben' bishee leteze' gone'ne' lo na' ben'ka' witgake'ne', na' beena' zoa xiine' gone'b' lo na' ben' wite'b'. Na' soa ben' yizoshi'e xaxneena' na' gone' legake' lo na' ben'ka' witgake' legake'.

22 Yog'lol' ben' gakzbangakile' le' daa nonlilall'le nad', per beena' so sakile' bittezə daa yen ile'ile' axt kat' guete', beenan' gat' yel' mban che' zejli kañi.

23 Shi to yell yilaggake' le', li yiyaj yell yoblə. La' dii li nia' le' bilan' yiyoll' tale yog'lol' yellki mbani Israeli kat' illin lla yiyed' nad', Ben' Bsel' Chioza'.

24 'To ben' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'.

25 Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

*¿Non chiyal' illebcho?**(Lc. 12:2-9)*

26 Bi illeble beñ'ka' biya dii w̄chi' wsak'gake' le'.  
 Ła' daa kono nezi naa, wllin lla ila'lawin, na' aga ga  
 de to dii ngash' dii bi illin lla ila'lawin.

27 Diika' chli' chsedid' le' do ngash'zə, li we'n dill'  
 ladj lkwe' beñ'. Na' diika' nia' le' to le'zə, li wzenin  
 yog'lol beñ'.

28 Bi illeble beñ'ka' cheengakile' witgake' le', la'  
 kwerp chele na'zan witgake', aga bi gak gongak-  
 ile' yichjlall'do'lena'. San Chiozan' chiyal' ille-  
 ble, la' len' wakə wlliyee kwerp chelena' len  
 yichjlall'do'lena' lo yi' gabila'.

29 'Ła'kzi wak si'cho chop byiñdo' kon to  
 sintabdo', ni tob bi guet shi Xacho Chioza' bi  
 wi'e latj.

30 Na' ka nakle le', axt yish' yichjlana' nłabe'.

31 Daan bi chiyal' illeble, la' zak'ch le' aga ka ba  
 zan byiñdo'ka'.

*Beñ'ka' chchebgake' lao beñ' nan nombia'gake'  
 Jesúza'**(Lc. 12:8-9)*

32 'Beena' we' dill' lao beñ' ine' nake' nad' txen,  
 ka'kzə nad' yep' Xa'na' zoa yabana' nake' nad' txen.

33 Na' beena' bi chcheb lao beñ' nan nake' nad'  
 txen, ka'kzə nad' yep' Xa'na' zoa yabana' bi nake'  
 nad' txen.

*Ni che Jesúza' gak beñ' chopla**(Lc. 12:51-53; 14:26-27)*

34 'Bi gakzile bid' lo yell-lioni kwenche gon' ka  
 soalen ljwell beñ' mbalaz. Aga daan bid', san bid'  
 kwenche wxia' wdil.

35 Daa bid' na' yidil-len beṅ' byona' x̄e'na' na' noola' yidil-lene' x̄neena', na' beena' zoa xoolille' yidil-lene' le'.

36 Na' beṅ'ka' zoa toz yoo gakzbani ljwelle'.

37 'Beena' chakchile' x̄e'na' wa x̄neena' aga ka nad', bi chidolee gake' nad' txen, na' ka'kzə shi chaktechile' xiṅe'na' ka nad', lekzka' bi chidolee gake' nad' txen.

38 Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen.

39 Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kaṅi.

### *Beṅ'ka' soagake' mbalaz yabana'*

*(Mr. 9:41)*

40 'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'.

41 Beena' wlebe' to beṅ' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to beṅ' chone' daa nak shli daa chibaile' nake' beṅ' li beṅ' shao', lekzka' lene'n ikee ka laxj beena' chon daa nak shli.

42 Na' beena' we' la'ch' lat' nis yeej beṅ'ki nakgake' nad' txen, dii li nia' le', de laxje'.

## 11

1 Na' ka biyoll goll Jesúza' beṅ'ka' shllin bin chiyal' gongake', na'ch bizee na', na' jali' jasedile'

ben' na' jtixje'ile' legake' cho'a xtill' Chioza' yellka' llia gana' mbani Galileana'.

*Ben'ka' bsel' Juan wichoa nisa'*  
(Lc. 7:18-35)

<sup>2</sup> Na' Juanna' beena' chchoa ben' nisa', ba die' lillyana'. Ka wñezile' daa chon Crístona', na'ch bselee chop ben'ka' nakgake'ne' txen gana' zoe'.

<sup>3</sup> Na' janabgakile'ne' che'gake':

—¿Alin' beena' ba llia bia' yid?, ¿anti chiya! kweznto' sto ben' yoblə?

<sup>4</sup> Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'.

<sup>5</sup> Li lljayelle' chon' ka chle'i ben' lcholka', na' chiza' ben'ka' bi chak sa', na' chiyaki ben'ka' che'i lepra, na' chiyeni ben' kwellka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'.

<sup>6</sup> Chakomba beena' chajle' cha' na' bi chakchoplallee.

<sup>7</sup> Na' ka biza' ben'ka' bsel' Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e?

<sup>8</sup> Shi bi nakan ka', ¿nakran nak beena' jawiale? ¿Ato ben' nakw xalaane' dii le nakə? Bi nakan ka'. La' ñezkzile ben'ka' nakw xalaangake' dii le nak zoagake' loo yoo lill ben' wñabia'ka'.

<sup>9</sup> ¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na'

chontechle' ka beṅ'ka' chyixjee daa che' Chioza' legake'.

<sup>10</sup> La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',

na' chixji'e xtilloona' kwenche soa beṅ' wzenag-gake' cho' kat' illino'.

<sup>11</sup> Dii li nia' le', ladj yog' beṅ' yell-lioki, ni toe' biṅ' ichej gake' beṅ' zak'chi' aga ka Juanna' beena' chchoa beṅ' nisa'. Per nottezə beena' choe' latj inabia' Chioza' yichjlall'do'ena', zak'teche' aga ka Juanna'.

<sup>12</sup> 'Kon ka wzolo Juanna' bchoe' beṅ' nisa' axt naanlla, zoa beṅ' chsej chllongake' kono wleb yel' wṅabia' che Chioza'.

<sup>13</sup> Librka' daa bzej dii beṅ'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wṅabia' che Chioza', na' lekzannan' cho'e Juanna' dill' naa blee.

<sup>14</sup> Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'.

<sup>15</sup> Ka le' chenile dga nia', li sen wneyi.

<sup>16</sup> ¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljwellb':

<sup>17</sup> “Bkwellnto' bbleja' na' bi byaale, na' beṅto' daa chon nyesh' na' ni bi wchellkzle.”

---

\* **11:12** Zoa beṅ' chsej chllongake' kono wleb yel' wṅabia' che Chioza': dga nakan to dii lallj. Lekzka' baḷ beṅ'ka' nsed nagake' versiculoni zejín: zoa beṅ' chongake' axt ga zeelo chakgake' kwenche inabia' Chioza' legake'.

18 *La'* Juanna' bi weej wdawe' dii wen dii shao', na' w<sub>n</sub>agake' *che'*: “Dii xiwaan yo'e.”

19 Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to be<sub>n</sub>' waoxat na' to weezo, na' lekzka' nagake' non' txen be<sub>n</sub>' wen dii malka' na' be<sub>n</sub>' wixhixjka'. Per yel' sin' *che* Chioza' chli'lawin ka chsa' *che* be<sub>n</sub>'ka' chzenaggake' *che'*.

*Yellka' gana' bi bzenaggake' che Jesúza'*  
(Lc. 10:13-15)

20 Na'ch wzolo Jesúza' bsheshlene' be<sub>n</sub>' yellka' gana' bli'che' yel' waka', daa bi biyaj bilengakile' xtoleeka'. Na' wne':

21 —¡Nyesh'laz gak *chele*, le' be<sub>n</sub>' yell Corazín! ¡Nyesh'laz gak *chele*, le' be<sub>n</sub>' yell Betsaida! *La'* shel' be<sub>n</sub>'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilentelja-gakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'.

22 Na' daa bi biyaj bilenile, ba nia' le', llana' wchoglo Chioza' *che* be<sub>n</sub>', dii walch sak'zi'le aga ka be<sub>n</sub>' Tíroka' na' be<sub>n</sub>' Sidónka'.

23 Na' le' be<sub>n</sub>' Capernaúm, ¿achakile willinle yabana'? Aga willinle na', san latj gana' sak'zi'len yillinle. *La'* shel' be<sub>n</sub>' Sodómaka' ble'gakile' yel' wakka' daa ba ble'ile, balja biyaj bilengakile' saaxya *che*'ka' na' ni ndia yella', shel'ka'.

24 Daan nia' le', kat' illin lla wchoglo Chioza' *che* be<sub>n</sub>', dii walch sak'zi'le aga ka be<sub>n</sub>' Sodómaka'.

*Mbalaz soa be<sub>n</sub>'ka' gonlilall'gake' Jesúza'*  
(Lc. 10:21-22)



25 Na' lo gora' w̄ne Jesúza', chi'e:

—X̄a, li' nako' x̄an yabana' na' yell-lioni, choe'lawaa li' daa bkwashilo' beṇ' sin'ka' diika' ba bliilo' beṇ'ka' bibi chajni.

26 Beno' ka', X̄a, la' kan' wyazlalloo.

27 Na'ch goll Jesúza' beṇ'ka':

—X̄a'na' bene' lall' na' yog'loḷ daa chon'. Na' ni to kono nombia'yen' nad' lete X̄a'na', na' lekzka' kono nombia'yen' X̄a'na' lete nad' nak' Xiine' len beṇ'ka' cheenid' gon' ka gombia'gake'ne'.

28 Li gonlilall' nad', yog'le le' ba chjshiaile na' nakle ka beṇ' ntakw n̄chej to dii zii dii zshab, na' nad' gon' ka yizi'lall'le.

29 Li gon ka nia', na' li wzenag daa chzajniid' le', la' nad' nak' beṇ' gaxjlall' na' gon' ka gat' yel' wixi'lall' chele.

30 Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

## 12

*Beṇ'ka' nak Jesúza' txen wdishjgake' trígona' llana' chombaangake'*

*(Mr. 2:23-28; Lc. 6:1-5)*

1 To lla sabd, llana' chombaang beṇ' Israelka', wdelen Jesúza' beṇ'ka' nakgake'ne' txen to ga naz to beṇ' trígona', na' beṇ'ka' zejlengake'ne' wzolo wdishjgake' trígona' na' wdaogake'n.

2 Na' ka ble'i fariseoka' daa chon beṇ'ka', na'ch che'gake'ne':

—Bwia ka chon beṇ'ki nakgake' li' txen, chongake' daa bi chiyal' goncho llani chombaangcho.

3 Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdongake'?

<sup>4</sup>Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxozka' de lsens gaogake'.

<sup>5</sup>¿Abin' wlable leya' gana' nan aga bi xya nakan che bxozka' la'kzi chongake' llinna' loo yoodo'na' llaka' chombaanch'o?

<sup>6</sup>Na' nia' le', ladjleni zoa to ben' zak'che' aga ka yoodo'na'.

<sup>7</sup>Bilja wyajniile bi zeji Cho'a Xtil' Chioza' daa na: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” La' shel' le' wyajniilen, aga waole xya che ben' bi nap dol', shel'ka'.

<sup>8</sup>Nad', Ben' Bsel' Chioza' Yell-lioni, chnabi'a lao llani chombaanch'o.

*Jesúza' biyone' to ben' llana' chombaanch' ben' Israelka'*

*(Mr. 3:1-6; Lc. 6:6-11)*

<sup>9</sup>Na'ch biza' Jesúza' latja', na' biyaje' gana' chdop chllag ben' Israelka' choe'lwillgake' Chioza'.

<sup>10</sup>Na' ladj ben'ka' len to ben' net tlaa neena'. Na' fariseoka' chwiagake' naklā ka si' sengake' kwenche gaogake' xya che Jesúza', na'ch wñabgakile'ne', che'gake':

—¿Beran na leya'? ¿Ade lsens yiyoncho to ben' bi shao' llani chombaanch'o?

<sup>11</sup>Na'ch che' Jesúza' legake':

—Shi nole zoa to xil' chele na' ixopb to loo yech llaki chombaanch'o, ¿abi yibejleb'?

<sup>12</sup>Na' jzak'techlā benecha' aga ka xilaa! Daan de lsens goncho daa nak wen llaki chombaanch'o.

13 Na'ch golle' beena' net t<sub>l</sub>aa neena':

—Bli noona'.

Na'ka bli neena' lii biyakten ka nak daa zi sh<sub>l</sub>aa.

14 Na'ka biza' fariseoka' gana' chdop chllaggake',  
be'gake' dill' nak sho' x<sub>n</sub>ezi witgake' Jesúza'.

*Daa wna dii Isaíaza' che Jesúza'*

15 Ka gokbe'i Jesúza' daa cheengakile' gongake',  
na' bizee ziyaje' gan yoblə. Na' be<sub>n</sub>' zan inlleb  
janoe'ne' na' biyone' yog' be<sub>n</sub>'ka' bi shao'.

16 Na' golle' be<sub>n</sub>'ka' biyone' bi we'gake' dill' daa  
chone'.

17 Daa bene' ka', billinin ka wna dii Isaíaza',  
beena' wdixjee daa goll Chioza'ne', kana' wne':

18 Beenin nake' wen llin cha', beena' ba wlej',

na' le chakidee na' chazlallaa ka chone'.

Na' wzoa' Espíritu cha'na' loo yichjall'do'ena',

na' chixje'ile' be<sub>n</sub>'ka' lle' yell-lioni ka cheenid'  
gongake'.

19 Bi gakt<sub>l</sub>il-lene' be<sub>n</sub>' ,

na' ni bi gosyee wi'e dill' yawi nez.

20 Aga wisyoll wistoe' chishje' yaxtila' daa ba  
chashjə.

na' aga wisole' mesha' daa ba chiyol,

axt ki gone' gan wli'lao yel' li yel' shao' che'na'.

21 Na' be<sub>n</sub>' lle' doxen yell-lioni gongake' lez len'  
gaklene' legake'.

*Nagake' che Jesúza' chibeje' dii xiw'ka' kon yel'  
wak cheyinna'*

*(Mr. 3:19-30; Lc. 11:14-23; 12:10)*

22 Jwa'gake' lao Jesúza' to be<sub>n</sub>' yo'e dii xiw' na' bi  
chle'ile' ni bi chak inie'. Na' bibej Jesúza' dii xiwaa  
yo'e, na' bile'ile' na' gokte binie'.

23 Yog'lo<sub>l</sub> ben'ka' bibangakile' ka nak daa bene', na' chisne':

—¿Aaga beenin xiin dia che dii Davina', beena' chbezcho, lla?

24 Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak che Bezlona',\* daa chñabia' dii xiw'ka'zan, chibejile' diika'.

25 Na' gokbe'i Jesúza' daa chza'lall' fariseoka', na'ch chi'e legake':

—Shi gana' chñabia' to ben' na' tilgake' to lezgake' na' gakgake' choplə, na' kwiayi' gana' chñabi'e, na' ka'kzə shi to yell wa ben' lle' toz yoo gakgake' choplə aga wdiagake'.

26 Ka'kzə Satanáza', shi yibej ljwell dii xiwiinka' yoo ben', aga wdia yel' wñabia' cheyinna', shel'ka', la' to lezgakannan' chidi<sub>l</sub>-len kwingakin.

27 Le' nale chibej' dii xiwaa yoo ben' kon yel' wak che Bezlona'† daa chñabia' legakan. ¿Shera ben'ka' nakle txen? ¿Alezkza' lennan' chibejlengake' dii xiw'ka' yoo ben'? Daa bi nakan ka', na' chli'n naklejjile.

28 Na' shi nad' chibej' dii xiw'ka' kon yel' wak che Espíritu che Chioza' zejín ladjleni ba bla' yel' wñabia' che Chioza'.

29 'Aga no gak sho' lill to ben' wal na' kwane' dii de che' shi bi wcheje'ne' zigaate. Na'chan gak kwane' lille'na'.

---

\* **12:24** Bezlo: lezkannan' Beelzebú de xtil na' nakan sto le Satanáza'. † **12:27** Bezlo: lezkannan' Beelzebú de xtil na' nakan sto le Satanáza'.

30 'Beena' bi chone' nad' txen, len' chakzbanile' nad'; na' beena' bi chaklene' nad' kwenche wzenag ben' che Chioza', len' chsej chllone' wzenaggake'.

31 'Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espíritu Sántona' na' cheyi diika' chone', aga wizi'xen Chioza' chele.

32 Na' shi no ine cha', nad', Ben' Bsel' Chioza' Yell-lioni, lezka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

*Kon ka nak yaga', ka'te nak daa chbian*

*(Lc. 6:43-45)*

33 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian.

34 ¡Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a loll'chona' za'n loo yichjlall'do'chona'.

35 Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'.

36 Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele.

37 La' shi le' choe'le dill' wen, na'ch ina Chioza' bibi dol' nable; per shi le' bi choe'le dill' wen, na' wchogloe' chele sak'zi'le.

*Wnabi ben' malka' Jesúza' wli'e to yel' wak*

*(Mr. 8:12; Lc. 11:29-32)*

38 Na'ch bal fariseoka' na' beṅ'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee lí'.

39 Na' che' Jesúza' legake':

—Le' nakle beṅ' mal na' beṅ' bi chzenag che Chioza' chñable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile' to dii nak ka yel' wak daa ben Chioza' che dii Jonáza'.

40 La' Jonáza' wyo'e shonə lla shonə yel loo lee bel xenna', na' ka'kzə nad', Beṅ' Bsel' Chioza' Yell-lioni, shon lla shon yel igaana' loo bana'.

41 Kat' illin lla wchoglo Chioza' che beṅ' yell-lioni, kanan' dii beṅ' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'.

42 Na' lekzka' llana' kat' wchoglo Chioza' che beṅ' yell-lioni, noola' wñabia' yellka' lle' do lli'lə gawe' xya chele, le' zoale naa, la' len' wzee zit' nleb bidzenague' dill' sin' daa wne dii Salomónna'. Na' nad', zak'techid' aga ka dii Salomónna' na' bi chzenagle cha'.

*Dii xiwaa daa chiyoo beṅ'*  
(Lc. 11:24-26)

43 'Kat' chichej dii xiwaa yoo beṅ', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin,

44 na'ch chakin: “Yiyaach' dii yoblə gana' bichejkz'.” Na' kat' yillinan gana' bichejan, nakan ka to yoo desh dii nxi n̄loa.

45 Na'ch lljaxi'n zi gall dii x̄iw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che beñ' malka' lle' n̄aa.

*Bllin x̄na' Jesúza' len beñ' bisheeka' gana' zoe'*  
(Mr. 3:31-35; Lc. 8:19-21)

46 Ni choe'lente Jesúza' beñ'ka' dillaa ka bllin x̄neena' len beñ' bisheeka' goklall'gake' wshaljlen-gake'ne' na' wzegake' lesh' chyoona'.

47 Na' goll to beñ' Jesúza':

—X̄noona' len beñ' bishooka' zegake' lesh' chy-  
oona' cheengakile' wshaljlengake' li'.

48 Na' che' Jesúza' beena' golle'ne' ka':

—¿Noran x̄na'na' na' noran beñ' bishaaka'?

49 Na'ch bli'e beñ'ka' nakgake'ne' txen na' chi'e:

—Beñ'kin x̄na'na' na' beñ' bishaaka'.

50 La' nottezə beena' chon ka cheeni X̄a'na' zoa yabana', beenan' nake' beñ' bishaa, beñ' zan' na' x̄na'.

## 13

*Jempl che to beñ' goz goon*  
(Mr. 4:1-9; Lc. 8:4-8)

1 Na' lo llana'tezə wza' Jesúza' yoona' gana' zoe' na' jchi'e cho'a nido'na'.

2 Na' daa bdop beñ' zan gana' chi'e, na' wyep'e' jshie' to loo barkw. Na' yog' beñ'ka' bdop bllag wzegake' cho'a nido'na'zə.

3 Na'ch bseese zan jemplka' kwenche bli bsdile' legake', chi'e:

—To ben' goz goon wzee zeje' goza'.

4 Na' ka zej chzalee binna', bxop balan cho'a neza' na' bllin byinka' wdaogakban.

5 Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj.

6 Na' ka wna'n wbillla', bkwedan na' wbillten daa bitek bde loinna'.

7 Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan.

8 Na' zi balan bxop lo yo wenna', na' wlliachgan. Balan wllia to guiyoa, na' zi balan wllia guiyon na' zi balan wllia shichoa.

9 Ka le' chenile dga nia', li sen wneyi.

*Jesúza' bzajniile' biche chzoe' jemplka'*

*(Mr. 4:10-12; Lc. 8:9-10)*

10 Na' ben'ka' nak Jesúza' txen jabig'gake' kwite'na', wñabgakile'ne':

—¿Biche chseeso jemplka' kat' chli' chsedilo' ben'?

11 Na' che' Jesúza' legake':

—Chioza' cho'e latj inezile ka nak yel' wñabia' che'na' daa kono nezi. Na' ben'ka' bi nak nad' txen, bi cho'e latj inezgakile'n.

12 La' beena' ze wneyi shajniile' Cho'a Xtill' Chioza', zizikli shajni'chile'n. Na' beena' bi se wneyi shajniile'n, na' gal-lallee daa ba wyajniile' lat'.

13 Daan chseesaa jemplka' kat' chzajniid' legake'. La' ben'ka' chwiategake' na' bi chakbe'gakile' bin zeji daa chon', na' chengakile' daa chnia' na' bi chajni'gakile' bin zejin, daa bi chajle'gake' cha'.



14 Na' daa chongake' ka', chillinin ka wna dii Isaíaza' ka wdixji'e daa goll Chioza'ne', daa na: La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

15 La' yichjlall'do'eka' nchol nntin, na' chongake' ka beñ' ndap naguin na' ka beñ' nshod' jalawin.

Shel' bi chongake' ka', na' shajni'gakile' daa chzajniid' legake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto beñ' wen.

16 'Per chakomba le' chakbe'ile bi zeji diika' chle'ile chon' na' chajniile diika' chli' chsedid'.

17 Dii li nia' le', zan dii beñ'ka' wdixjee daa goll Chioza' legake' na' zan dii beñ'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

*Bizajnií Jesúza' legake' bi zeji jempl che beñ' goz goona'*

*(Mr. 4:13-20; Lc. 8:11-15)*

18 'Li wzenag bin zeji jempl che beñ' goz goona'.

19 Beena' cheni cho'a xtill' Chioza' daa chzajniin le' che yei' wñabia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjlall'do'ena'.

20 Na' beena' cheni cho'a xtill' Chioza' na' le chibaile' chlebe'n, nake' ka ladj yajka' gana' bxop binna'

21 daa bitek bi loin bde na' bi bdian. La' kat' bi chak che' wa chchi' chsak' ben' le' ni che cho'a xtill' Chioza', na' lii chbejte yichje'n.

22 Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan.

23 Per beena' cheni cho'a xtill' Chioza' na' chajni-ile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

*Jempl che yixaa daa bla' ladj trígona'*

24 Na' bsees' Jesús'a sto jempl, chi'e legake':

—Yel' wñabia' che Chioza' nakan ka to ben' goze' bin wenna' lo yell-lío che'na'.

25 Per wal' chela' shlak chese', wyaj to ben' chakzbanile'ne' jeze' ladj trígona' daa nak x̄enin, na' ka biyoll bene' ka' bizee.

26 Na' ka bgol trígona' na' wllian, na' lekzka' bgolte x̄eninna' ladjinna'.

27 Na' wyaj wen llinka' jellgake' x̄aninna': “Ben'do', ¿aaga bin wennan jezo' lo cho'na'? ¿Gara wza' x̄eninna' lenzan ladjinna', lla?”

28 Na' che' x̄aninna' legake': “Nochod' ben' chakzbanile' nad' jene' ka'.” Na' goll wen llinka' le': “¿Acheenilo' shajnto' lljalall'nto'n?”

29 Na' chi'e legake': “Bi lljalall'len, la' nxoll lente trígona' wllall'le.

30 San igol-lenchan trígona', na' kat' illin lla yichoggake'n, na' yep' ben'ka' zigaate

yilall'gake' x̄eninna' na' gongake'n sh̄len wej  
kwenche sheyan, na'tech yitopgake' trígona' na'  
yigooshao'gake'n l̄oo lillinna'."

*Jempl che sa mostásana'*  
(Mr. 4:30-32; Lc. 13:18-19)

<sup>31</sup> Na' l̄ekzka' bzoa Jesúza' sto jempl, chi'e:

—Yel' w̄nabia' che Chioza' nakan ka sa  
mostásana' daa goz to beñ' lo yell-lío che'na'.

<sup>32</sup> La'kzi sa mostásana' nakan liizelozi diido' yid  
lao bichl̄ə sa yix' kwan, kat' chl̄a'n na' chgolan na'  
chakan dii xench aga ka yix' kwanka' sto, na' axt  
byiñdo'ka' chon lillbka' lo xoziiinna'.

*Jempl che levadúrana'*  
(Lc. 13:20-21)

<sup>33</sup> Na' l̄ekzka' bzoe' sto jempl, chi'e:

—Yel' w̄nabia' che Chioza' nakan ka levadúrana'  
daa ch̄chix̄ to nool̄ə shoña rob yezja' kwenche  
yisgolan kwa che yetxtila'.

*Jesúza' b̄chine' jemplka'*  
(Mr. 4:33-34)

<sup>34</sup> Jesúza' toshiizi b̄chine' jemplka' ka bi'e dill'  
ladj lao lkwe' beñ'.

<sup>35</sup> Na' daa ben Jesúza' ka', billinin daa wdix̄jee to  
beñ' daa goll Chioza'ne', ka wne':

W̄chin' jemplka' ka we'len' beñ' dill'.

We'len' beñ' dill' cheyi daa konon' in̄ezi dezd kana'  
b̄xe bsilte Chioza' yell-lioni.

*Bizajnií Jesúza' bi zeji jempl che yix̄aa daa bla'*  
*ladj trígona'*

<sup>36</sup> Na' bisa' Jesúza' ben'ka' lle' na', na' biyo'e loo yooná'. Na' ben'ka' nakgake'ne' txen jabig'gake' kwite'na' che'gake'ne':

—Bizajnií neto' bi zeji jempl che x̄en trígona'

<sup>37</sup> Na' goll Jesúza' legake':

—Kin zejín: Nad', Ben' Bsel' Chioza' Yell-lioni, zaklebid' beena' goz trígona'.

<sup>38</sup> Na' doxen yell-lioni zaklebin gana' goz beena' trígona'. Na' ben'ka' choe'gake' latj chñabia' Chioza' yichjlall'do'eka' zaklebgakile' trígona'. Na' ben'ka' choe'gake' latj chñabia' dii xiwaa yichjlall'do'eka' zaklebgakile' x̄en trígona'.

<sup>39</sup> Na' dii xiwaa zaklebin ben' mala', beena' jez ladj trígona' daa nak x̄enin. Na' llana' chilapgake', zaklebin llana' kwiayi' yell-lioni. Na' anjlka' zaklebgakile' ben'ka' chizi' chilap trígona'.

<sup>40</sup> Na' ka chitopgake' daa nak x̄en trígona' kwenche wzeygake'n, ka'kzan gak che ben'ka' chñabia' dii xiwaa yichjlall'do'eka' ka illin lla kwiayi' yell-lioni.

<sup>41</sup> Nad', Ben' Bsel' Chioza' Yell-lioni, wselaa anjl cha'ka' kwenche yitopgake' ben' wen dii malka' na' ben'ka' chzechgake' ben' yoblə gongake' dii mala'.

<sup>42</sup> Na' wzal'gake' legake' lo yi' gabilá' gana' kwellyesh'gake' na' gaoxaxj leye'ka' daa le gakshejlall'gake'.

<sup>43</sup> Na' ben' li ben' shao'ka' sho'gake' balaan choo balaan x̄en yabana' gana' chñabia' X̄acho Chioza'. Ka le' chenile dga nia', li sen wneyi.

*Jempl che mecha' ngash'*

44 'Yel' wñabia' che Chioza' nakan ka to mech xen dii ngash' to lo yell-lío che ben' gana' to ben' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

*Jempl che to perla dii zak'chga*

45 'Yel' wñabia' che Chioza' zaklebin to ben' chone' delgens che perla dii zak'chga.

46 Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

*Jempl che yixj che bela'*

47 'Yel' wñabia' che Chioza' zaklebin to yixj che bel. Ben'ka' chzen bela' chzal'gake' yixja' loo nido'na' na' chzenan zan kwen bel. 48 Na' kat' chilla' yixja' na' chibejgake'n cho'a nido'na' na' chbe'gake' chibegake' belka' nak wen na' ch-gooshao'gake'b to loo llom, na' baka' bi nak wen, chchoongake'b.

49 Kan' gak che benecha' ka illin lla kwiayi' yell-lioni. Anjlka' yibegake' ben' wenka' ladj ben' malka',

50 na' wzal'gake' ben' malka' lo yi' gabila' na' kwellyesh'gake' na' gaoxaxj leye'ka' daa le gakshe-jlall'gake'.

*Dii koba' na' dii gola'*

51 Na'ch che' Jesús'a' ben'ka' nakgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

52 Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile'

to xan yoo ben' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

*Jesúza' biyaje' Nazareta'*

(Mr. 6:1-6; Lc. 4:16-30)

<sup>53</sup> Ka biyoll bsees' Jesúza' jemplka', na' bizee.

<sup>54</sup> Na' ka billine' yell Nazareta' gana' bgole', na' bli' bsedile' ben' Israelka' chdop chllag gana' choe'lwillgake' Chioza'. Na' bibani ben'ka', che'gake':

—¿Gara jxi' beeni yel' sin' che'na', na' nak chak chone' yel' wakka'?

<sup>55</sup> ¿Aaga xiiñ karpintera'zan na' xneena' lie' María? Na' ¿aaga ben' bishee Jacóbona', Joséna', Simónna' na' Júdaza'?

<sup>56</sup> Na' ben' zane'ka' zoagake' lallchoni. ¿Gara jasede' yog'lol' diiki chli' chsedile', lla?

<sup>57</sup> Na' daa bi wyajle'gake' che' Jesúza', na' golle' legake':

—To ben' chyixjee daa che' Chioza'ne', gattez chgoogake'ne' balaan san lallille'na' aga no chgoo le' balaan.

<sup>58</sup> Na' aga bitek yel' wak ben' Jesúza' yell Nazareta' daa bi wyajle'gake' che'.

## 14

*Betgake' Juanna', beena' bchoa ben' nisa'*

(Mr. 6:14-29; Lc. 9:7-9)

<sup>1</sup> Na' do kana', Heródeza', beena' chñabia' gana' mbani Galileana', benile' ka nak daa chon Jesúza'.

<sup>2</sup> Na' golle' ben'ka' chon xshine'na':

—Beenan' dii Juanna', beena' bchoa beṅ' nisa'. Ba bibane' ladj beṅ' wetka', daan chak chone' yel' wakka'.

<sup>3</sup> La' kana' ni mban dii Juanna', Heródeza' bselee beṅ' beṅ'gake'ne' na' wloogake'ne' lillyana' ni che Herodíaza' xool beṅ' bisheena', beena' le Felipe.

<sup>4</sup> La' dii Juanna' golle' Heródeza':

—Bi nakan wen nkoo xool beṅ' bishoona'.

<sup>5</sup> Na' daa golle'ne' ka' goklall' Heródeza' wite'ne', per bi biyaxjile' daa bllebe' beṅ'ka' chajle' daa nak Juanna' to beṅ' chyixjee daa che' Chioza'ne'.

<sup>6</sup> Per ka wya'i Heródeza' yiz, bi' nool wew' che Herodíaza' byaab' lao beṅ'ka' lle' lṅina'. Na' daa le biyoolallii Heródeza' ka byaab'

<sup>7</sup> axt bzoe' Chioza' de taschiw bchebe' wi'eb' bittezə dii inabib' le'.

<sup>8</sup> Na' kon ka bzajonii xṅa'baab' bem', na' che'b' Heródeza':

—Yichj Juanna', beena' chchoa beṅ' nisa', cheenid' goṅo'n nad' to lo plat llilj.

<sup>9</sup> Na' gokyeshii Heródeza', per daa ba bcheble' lao yog' beṅ'ka' goxe' lṅina' wi'eb' kon daa inabib' le', beshaze' byen we'gake'b' daa wṅabb'.

<sup>10</sup> Na' bselee beṅ' jachoggake' yichj Juanna' loo lillyana'.

<sup>11</sup> Na' bliigake'n to lo plat llilj na' be'gake'n bi' nool wewaa na' be'baan xṅa'baa.

<sup>12</sup> Na'ch beṅ'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

*Jesúza' bwawe' gayaa mil beṅ'*  
(Mr. 6:30-44; Lc. 9:10-17; Jn. 6:1-14)

13 Na' ka wnezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono beñ' lle'. Na' ka wnezi beñ'ka' lle' yellka' llia gaozə cho'a nido'na' galan zej Jesúza', na'ch wloogake' nez janogake'ne'.

14 Na' ka bichej Jesúza' loo barkwa', ble'ile' beñ' zan inleeb ba lle' na', na' biyeshile' legake' na' biy-one' beñ'ka' bi shao'.

15 Na' ka ba wlle', na'ch beñ'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll beñ'ki yiyajgake' yellka' llia gaozə kwenche lljxi'gake' dii gaogake'.

16 Na' che' Jesúza' legake':

—Bi chonan byen yiyajgake'. Len', li we' dii gaogake'.

17 Na' che'gake'ne':

—Gay'chga yetxtil na' zi chopchga bel noa'nto' ni.

18 Na' che' Jesúza' legake':

—Li gonshkin ni.

19 Na'ch golle' beñ'ka' kwe'gake' lo yixa'. Na' bexee yetxtilka' gay' na' belka' chop na' blis lawe'na' yabana' na' bi'e Chioza' yel' choxken. Na'ch bxoxje' yetxtilka' na' bi'en beñ'ka' nakgake'ne' txen kwenche be'gake' che che beñ'ka'.

20 Na' wdao yog'lol beñ'ka' axt ka beljgakile'. Na' ka bidaogake', na'ch bitopgake' diika' bgaan, na' biyakan shllin xet'.

21 Na' beñ' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.



*Jesúza' wzee lo nido'na'*  
*(Mr. 6:45-52; Jn. 6:16-21)*

22 Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nido'na' to lezgake', na' le' bigaane' kwenche bisee ben'ka' bdop bllag.

23 Na' wde bisee ben'ka', na'ch wyep'e' to lo yaa kwenche jelwille' Chioza' toze'. Na' ni zetie' lo yaana' ka gol.

24 Na' barkwa' gana' ziyoo ben'ka' nakgake'ne' txen ba zejan gchol nido'na'. Chakan to ki to ka'lə daa chas chat' nisa', na' be'na' bi cho'en latj yiyajan shlich'a.

25 Na' zbalz biyetj Jesúza' lo yaana' na' bizee tlo nido'na' zeje' gana' zejlagake'.

26 Na' ka ble'i ben'ka' non Jesúza' txen zeje' tlo nisa', le bllébgake' na' ax̄t besyaagake', nagake':

—¡Ba za' to yel b̄xen!

27 Na' lii w̄nete Jesúza' legake', chi'e:

—Bi illeble. Nad'kzan'.

28 Na'ch w̄ne Pédróna' chi'e:

—X̄an', shī lin', ben ka gak saa lo nisi kwenche yid' kwito'na'.

29 Na' che' Jesúza'ne':

—Dashka'.

Na'ch bchej Pédróna' loo barkwa' na' wzoloe' chzee tlo nisa' nan shaje' kwit Jesúza'.

30 Per ka gokbe'ile' zechga be'na', na' bllébe' na' lii wzolote chbi'e yel, na'ch besyee chi'e:

—¡X̄an', bisla nad'!

31 Na' lii biyox̄'te Jesúza' neena', chi'ene':

—¿Berache gokchopzilo'? ¿Biche bi n̄xenilalloo nad' kwas̄lol?

<sup>32</sup> Na' kon ka biyoogake' loo barkwa' na' bgan be'na'.

<sup>33</sup> Na' beṅ'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

*Jesúza' biyone' beṅ'ka' bi shao' gana' mbani Genesareta'*

*(Mr. 6:53-56)*

<sup>34</sup> Na' ka bḷag'gake' shḷaa nido'na' na' bllingake' gana' mbani Genesareta'.

<sup>35</sup> Na' beṅ' Genesaretka' biyombia'gake' Jesúza' na'ch bzengakile' beṅ' yellka' lle' gao nan ba bllin Jesúza'. Na' jwa'gake' yog' beṅ'ka' bi shao' lawe'na',

<sup>36</sup> na' got'yogakile'ne' wi'e latj ḷa'ch' gox' beṅ' we'ka' xe'na', na' yog' beṅ'ka' beḅ'gake'n biyakgakile'.

## 15

*Daa chxinj yichjlall'do' benecha'*

*(Mr. 7:1-23)*

<sup>1</sup> Baḷ fariseoka' na' beṅ'ka' chli' chsedi leya', wza'gake' Jerusalénna' na' wyajgake' lao Jesúza', wṅabgakile'ne':

<sup>2</sup> —¿Biḅhe beṅ'ki nakgake' li' txen bi chongake' ka wyoolo dii xozxto'choka'? ḷa' bi chixis chiyib neeka' ka zi' gaogake'.

<sup>3</sup> Na' wṅabi Jesúza' ḷegake' chi'e:

—¿Biḅhe chyishjle daa nllia Chioza' bia' gonle na' zechle wṅeyi chonle ka ben dii xozxto'choka'?

<sup>4</sup> ḷa' kin wna Chioza': “ḷi gap xaxṅa'le balaan”, na' “Beena' ine zban che xe'na' wa xṅeena', chiyal' guete'.”

<sup>5</sup> Per le', nale wak ye' beṅ' xaxneena': "Bi gak gaken' le', la' yog' daa nap' ba ncheb' wi'an Chioza'."

<sup>6</sup> Na' beena' yee xaxneena' ka', cho'allalene' daa nale bi chonan byen gaklene' legake'. Na' daa chonle ka', chonile daa nllia Chioza' bia' goncho ka to dii bibi zakii kwenche nole diika' wyoolo dii xoxto'choka'.

<sup>7</sup> Le' beṅ' wxiye', le' wen gan! Kwaslōl inleeb be' dii Isaíaza' xtill'le, ka wne':

<sup>8</sup> Beṅ'ki choe'la'ogake' nad' de cho'a loll'zgake', la' aga do yichj do lall'gaken' choe'la'ogake' nad'.

<sup>9</sup> Bibi zjanayin chonzgake' ka beṅ' choe'la'o nad'; na' diika' chli' chsedgakile' nakgakan che beṅ' yell-lioz.

<sup>10</sup> Na' wne Jesúsza' beṅ'ka' lle' na', golle' legake':

—Li wzenag dga inia' le' na' li shajniin.

<sup>11</sup> Aga daa cheej chao beṅaan chxinj chlenan yichjlall'do'ena', san dill'ka' chchej cho'enan', lennan' chxinj chlenan yichjlall'do'ena'.

<sup>12</sup> Na'ch beṅ'ka' nak Jesúsza' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

<sup>13</sup> Na'ch goll Jesúsza' legake':

—Nottezə beṅ' bi chzenague' che Xa'na' zoa yabana', yiyol yinite', na' gak che' ka chak che to yag dii chlall' beṅ' do loyin.

<sup>14</sup> Jwayishazi fariseoka', la' nnit ncholgakilen'. Na' nezicho shi to beṅ' lchol wchi'e sto ljwell lchole', choptie' lljabix.

<sup>15</sup> Na'ch Pédróna' golle' Jesúsza':

—Bizajniin neto' bi zejín jempla' daa ba bseesoo.

16 Na'ch goll Jesúza' legake':

—¿Alekzka' lenle biñ' shajniile bi zejin daa ba wnia'?

17 ¿Abi nezile nan daa cheej chaocho chjche'n loo leechona' na'tech chiden?

18 Per ka nak daa chnecho, lënnan' chalj chxen loo yichjlall'do'chona'. Na' shi chnecho dii bi nak wen, lënnan' chxinj chlenan cho'.

19 La' loo yichjlall'do' benechan' chalj chxe diiki bi nak wen: yel' chon xya, yel' chnelen ljuwellin, yel' wban, yel' chyiljlall' che ben', na' yel' chbell chne che ben'.

20 Diikin chxinjan yichjlall'do' ben', aga daa bi chixis chiyib neena' ka zi' gawen'.

*To noolə bi nak ben' Israel benlilallee Jesúza'*

*(Mr. 7:24-30)*

21 Na' biza' Jesúza' wyaje' gana' mbani yell Tírona' len yell Sidónna'.

22 Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n leb'.

23 Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' goll-gake'ne':

—Goll nooli yiyaje', la' kon chosyee zidnoe' cho'.

24 Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

25 Na'ch noola' jabigüee kwit Jesúza' na' bchek' xibe'na' lawe'na' chi'ene':

—¡Xan', goklengach nad'!

26 Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

27 Na'ch noola' chi'ene':

—Lekzilo', Xan', per chak chao xikw'choka' di-ika' chxop lo yona'.

28 Na'ch goll Jesúza'ne':

—¡Noolə, nonlilall'likzo' nad'! Na' gak ka chee-nilo'.

Na' katena' lii biyakteyi bi' nool che'na'.

### *Jesúza' biyone' ben' zan*

29 Na' biza' Jesúza' na', na' billine' cho'a nido' che Galileana' na' wyepe' to lo yaa jchi'e.

30 Na' ben' zan blin lawe'na' nche'gake' no ben' bi chak sa', no ben' lchol, no ben' bi chak ine, no ben' nxinj, no ben' chak bichlə yillwe'. Na' bzoagake' legake' lao Jesúza' na' biyone' legake'.

31 Na' bibani ben'ka' ka gok, la' ben'ka' bi chak ine wnegake', na' ben'ka' nxinj biyakgakile', na' ben'ka' bi chak sa' wza'gake', na' ben' lcholka' ble'gakile'. Na'ch yog'lol ben'ka' be'la'ogake' Chios, beena' choe'la'o ben' Israelka'.

### *Jesúza' bwawe' tapa mil ben'*

(Mr. 8:1-10)

32 Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgakile' tneza'.

33 Na' che' ben'ka' nakgake'ne' txen:

—Per ¿ga lljxi'cho dii gao yog'lol ben'ki?, la' gani lle'cho kono zoa wit' dii gaocho.

<sup>34</sup> Na'ch wñabi Jesúza' legake', chi'e:

—¿Zi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

<sup>35</sup> Na'ch goll Jesúza' ben'ka' kwe'gake' lo yona'.

<sup>36</sup> Na' bexee yetxtilka' gall na' belka' na' bi'e Chioza' yel' choxken, na' bxoxje'n bi'en ben'ka' nakgake'ne' txen kwenche be'gake' che che ben'ka'.

<sup>37</sup> Na' yoguee wdao axt ka beljgakile'. Na' wdena' bitopgake' dii lao'ka' bichoonan, gokten zi gall xet'.

<sup>38</sup> Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao.

<sup>39</sup> Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

## 16

*Fariseoka' na' saduceoka' wñabgakile' Jesúza' gone' to yel' wak*

*(Mr. 8:11-13; Lc. 12:54-56)*

<sup>1</sup> Fariseoka' len saduceoka' jawiagake' Jesúza' na' wñabgakile'ne' gone' to yel' wak dii ile'gakile' kwenche wli'n shi Chiozan' bseleene'.

<sup>2</sup> Na' goll Jesúza' legake':

—Shlle'na' chwiale xan yabana' na' nale: “Le yillaa wx̄e, la' le n̄latjcha.”

<sup>3</sup> Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga

chakbe'ile bin zeji diika' chon Chioza' llaki zoacho ñaa.

<sup>4</sup> Le' nakle ben' mal na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile' sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

*Dill' wxiye' che fariseoka' zaklebin levadúrana'  
(Mr: 8:14-21)*

<sup>5</sup> Na' ka bllingake' shlaa niso'da', ben'ka' nakgake'ne' txen gol-lall'gake' wa'gake' yetxtila'.

<sup>6</sup> Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

<sup>7</sup> Na' che' ljwellgake':

—Daa gol-lall'cho wa'cho yetxtilan' ne' cho' ka'.

<sup>8</sup> Na' gokbe'i Jesúza' daa che' ljwellgake' na' golle' legake':

—¿Bi che nazle bibi yetxtila' bia'le? ¿Bi che bi nxenilall'le nad' kwaslo'?

<sup>9</sup> ¿Abikzan' shajniile ka nak diika' chon'? ¿Abi chjadinile kana' wdao gayaa mil ben' kon gay'zə yetxtilka' na' bal xet' dii bixjka' bitople?

<sup>10</sup> Na' ¿shera kana' wdao tapa mil ben' kon gallzə yetxtilka'? ¿Abi chjadinile bal xet' dii bixjka' bitople?

<sup>11</sup> ¿Bi che che yetxtila'lə wyajnzile ka wnia' wsak'gale che levadura che fariseoka' len saduceoka'?

12 Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

*Pédrona' chi'e Jesúza'n nake' Crístona'*

*(Mr. 8:27-30; Lc. 9:18-21)*

13 Na' ka bllin Jesúza' len ben'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na ben' yell-liona' nak', nad', Ben' Bsel' Chioza' Yell-lioni?

14 Na' che'gake'ne':

—Bale' nagake' nako' dii Juanna', beena' bchoa ben' nisa', na' zi bale' nagake' nako' Elíaza', na' zi bale' nagake' nako' dii Jeremíaza', na' bale' nagake' nako' sto ben' chyixjee daa che' Chioza'ne'.

15 Na'ch chi'e legake':

—¿Shera le'? ¿Nora nale nak'?

16 Na' Simón Pédróna' chi'ene':

—Lin' Crístona', Xiin Chios yaa Chios banna'.

17 Na' Jesúza' chi'ene':

—Chakomba li' Simón, xiin Jonás, la' aga nochlan bzajnii li' daa ba wno'. Xa'na' zoa yabanan' ba bzajniile'n li'.

18 Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch ben'ka' gonlilall'gake' nad', na' ni yel' wita' bi yizoin wlliyai'n ben'ka' ba wlej' kwenche nakgake' lall' na'.

19 Na' gon' li' yel' wnabia' daa zaklebi to xiinya dii chsaljan yabana' gana' chnabia' Chioza'. Na' diika' ino' bi chiyal' gon ben' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.



20 Na' goll Jesúza' ben'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

*Jesúza' bi'e dill' witgake'ne'*

*(Mr. 8:31-9:1; Lc. 9:22-27)*

21 Na' lo llana' wzolo Jesúza' bzajniile' ben'ka' nakgake'ne' txen daa lia bia' gak che'. Golle' legake' chonan byen yiyaje' Jerusalénna' kwenche gake' lo na' ben' golka' chnabia' na' lo na' bxoza' chnabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shoñ lla yibane' ladj ben' wetka'.

22 Na'ch Pédróna' wleje' Jesúza' ladj ben'ka' chi'ene':

—Xan', jbat gak cho' ka ba wno'!

23 Na' biyechj Jesúza' chi'e Pédróna':

—Kwas ka'la, Satanás. Cheenzilo' bi gon' daa lia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

24 Na' che' Jesúza' ben'ka' nakgake'ne' txen:

—Shi no cheeni gon nad' txen, chiya! wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa.

25 La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kani.

26 ¿Bera zjanayin gap ben' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee.

27 La' nad', Ben' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to ben' kon ka dii bene'.

28 Dii li nia' le', baḷ-le lle'le ni, ni mbanle ile'ile yel' wñabia' cha'na', nad', Beñ' Bseḷ' Chioza' Yell-lioni.

## 17

### *Biyak Jesúza' nlla'lə*

(Mr. 9:2-13; Lc. 9:28-36)

1 Ka wde xop lla, bche' Jesúza' Pédróna', na' Jacóbona' len beñ' bishee Juanna', na' to lezgake' wyajlene' to lo yaa xen.

2 Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillá', na' xe'na' nakwe' gokan xtil llyish axt chey cheeni'n.

3 Na' beñ'ka' lle'lengake'ne' ble'gakile' dii Moiséza' na' Elíaza' chshaljengake' Jesúza'.

4 Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon ransh, ton cho', ston che Moiséza' na' ston che Elíaza'.

5 Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiiṇaa, beena' chakid', na' chazlall'chga' ka chone'. Li wzenag che'.

6 Na' beñ'ka' nak Jesúza' txen, ka bengakile' wñe Chioza', le bblebchgagake' na' to bdoszgake' lo yona'.

7 Na' wbig' Jesúza' kwite'ka' bexee legake', chi'e:

—Li yiyas. Bi illeble.

8 Na' ka bilis yichje'ka', koch no beñ'ka' ble'gakile', stochga Jesúza'.

9 Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Ben' Bsel' Chioza' Yell-lioni, ba biban' ladj beñ' wetka'.

<sup>10</sup> Na'ch beñ'ka' nak Jesúza' txen che'gake'ne':

—¿Berache naz beñ'ka' chli' chsedi leya' zigaate Elíazan' yiyed?

<sup>11</sup> Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lo'lte.

<sup>12</sup> Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Ben' Bsel' Chioza' Yell-lioni.

<sup>13</sup> Na' gokbe'gakile' nan che Juanna', beena' bchoa beñ' nisan' cho'e dill'.

*Jesúza' biyone' to bi' chaz shon*

(Mr. 9:14-29; Lc. 9:37-43)

<sup>14</sup> Na' ka billingake' gana' lle' lla' beñ', na'ch bchej to beñ' jabiguae kwit Jesúza' na' bchek' xibe'na' lawe'na', chi'ene':

<sup>15</sup> —Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bzala'n leb' lo yi'nā' na' lekzka' loo nisa'.

<sup>16</sup> Na' ba jwa'b' lao beñ'ka' nakgake' li' txen na' bi gok yiyongake'b'.

<sup>17</sup> Na' goll Jesúza':

—¿Zi'tegalə chelena', le' beñ' mal na' beñ' bi chajle! ¿Zi ka'k'tek chiya'l' soalen' le'? Na' ¿zi ka'k'tek chiya'l' soid' le'? Li da diwa' bi' xkwidaa ni.

<sup>18</sup> Na'ch bsheshlen Jesúza' dii xiwaa yoob' na' bichejan. Na' katena' biyakib'.

19 Na' ka biyoll gok ka', beṅ'ka' nak Jesúza' txen bshaljengake'ne' to lezgake', gollgake':

—¿Biche bi gok yibejnto' dii xiwaa yoo bi' xk-widaa?

20 Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwas ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'.

21 Kwenche gak yibejle dii xiwaa ka daa bibej' bi' xkwidaa, chiyal' soale wbas' na' soachechle we'llwill-le Chioza'.

*Sto shii wdixjee Jesúza' witgake'ne'*

*(Mr. 9:30-32; Lc. 9:43-45)*

22 Na' shlak chdalen Jesúza' beṅ'ka' nakgake'ne' txen gana' mbani Galileana', golle' legake':

—Nad', Beṅ' Bsel' Chioza' Yell-lioni, gak' lo na' beṅ' malka'.

23 Na' witgake' nad', na' ka gak shon lla yiban' ladj beṅ' wetka'.

Na' ka golle' legake' ka', le gokyesh'gakile'.

*Jesúza' wdixje' daa chiyal' gaxj che yoodo'na'*

24 Na' ka billin Jesúza' len beṅ'ka' nakgake'ne' txen Capernaúma', beṅ' Israelka' beṅ'ka' chchixj che yoodo'na' jawiagake' Pédrona', na' wṅabgakile'ne':

—¿Achyixj maestro chelena' daa chidol'cho we'cho che yoodo'na'?

25 Na' goll Pédrona' legake':

—Awe, chyixje'n.

Na' ka biyoo Pédrona' loo yoona' gana' zoagake',  
Jesúza' bkwialoe' dillaa chí'e:

—¿Nak ka chakilo', Simón? Ben'ka' chñabia' yell-  
lioni, ¿aben' wlall che'kan' chchixjgake'?, ¿awa ben'  
zit'kan'?

<sup>26</sup> Na' billii Pédrona' xtilleena':

—Ben' zit'kan' chchixjgake'.

Na' goll Jesúza'ne':

—Zejin ben' wlall che'ka' bi chonan byen  
chixjgake'.

<sup>27</sup> Per kwenche bi wshaachogake', wyaj cho'a  
nisdo'na' na' wza<sub>loo</sub> daa chzenilo' belá'. Na' bel  
necha' seno' wxoo cho'aba' na' loo cho'aba' yil-  
lelilo' to mech. Waktekin lljtixjo' che choptecho.

## 18

*Ben'ka' nak Jesúza' txen gokdilgake' nogaken' nak  
ben' zak'chi*

(Mr. 9:33-37; Lc. 9:46-48)

<sup>1</sup> Na' do kana'kzə, ben'ka' nak Jesúza' txen  
jabig'gake' kwite'na' che'gake'ne':

—¿Noran nak ben' zak'chi ladj ben'ka' chñabia'  
Chioza'?

<sup>2</sup> Na' wñe Jesúza' to bi'do' na' bzie'b' ladje'ka'.

<sup>3</sup> Na'ch chí'e legake':

—Dii li nia' le', beena' bi yiyak yichjlall'do'ena'  
ka che bi'do'ni kwenche inabia' Chioza' le', bi lene'  
ben'ka' chñabia' Chioza'.

<sup>4</sup> Daan beena' wlexj yichje' wzenague' che  
Chioza' ka chlexj yichj bi'do'ni chzenagb' che  
xaxna'baa, beenan' zak'chi ladj ben'ka' chñabia'  
Chioza'.

<sup>5</sup> Na' beena' wlebe' to bi'do' ka bi'do'ni daa  
chonlilallee nad', nad'kzan chlebe'.

*Xoll ibixcho lao dii mala'*  
*(Mr. 9:42-48; Lc. 17:1-2)*

<sup>6</sup> 'Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlekgake'ne' yel loo nisdona' aga ka daa wchixe' ben' lao dii mala'.

<sup>7</sup> ¡Nyesh'laz che ben' yell-lioki!, la' biga iyallji daa gonan ka wxinj wļengake'. Per ¡nyesh'lazch gak che beena' gon ka wxinj wļen ben' yoblə!

<sup>8</sup> 'Na' shi noona' wa ni'ona' gonan ka ibixō' lao dii mala', naklan wen wchogo'n na' choono'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol.

<sup>9</sup> Na' shi daa ile'ilo' kon jalawo'na' gonan ka ibixō' lao dii mala', naklan wen wļechjo'n na' choono'n, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

*Jempl che xilaa wnit*  
*(Lc. 15:3-7)*

<sup>10</sup> 'Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. <sup>11</sup> La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa wlliyi'n legake'.

<sup>12</sup> ¿Nak chakile? Shi to ben' lle' to guiyoa xil' che' na' nit tob, ¿abi wkwaane' baka' taplalj twalj na' shaje' lljadilje' bana' wnit?

<sup>13</sup> Na' shi yillelile'b, lech yibaile' cheb aga ka che baka' taplalj twalj baka' lle' tozga.

14 Ka'kzan Xacho Chioza' zoa yabana' cheenile' ni to beṅ'ki zi' wzolo chonlilall' nad' bi kwiayi' shel'ka'.

*Chiyal' si'xecho che beṅ'ka' nakcho txen chonlilall'cho Chioza'*  
(Lc. 17:3)

15 Shi to beṅ' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen.

16 Per shi bi wzenague' bin yoone', na'ch wchi'o sto chop beṅ' kwenche gakgake' taschiw che daa yoone'.

17 Na' shi ni ka' bi wzenague' chele, wak ye'le yog' beṅ'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che beṅ'ka' bi wzenague', na'chan gonilene' ka to beṅ' bi nonlilall' Chioza' wa ka to beṅ' wichixj.

18 Na' dii li nia' le', diika' inale bi gon beṅ' yell-lioni, lekzka' ina Chioza' zoa yabana', na' diika' inale wak gon beṅ' yell-lioni, lekzka' ina Chioza' zoa yabana'.

19 Na' lekzka' nia' le', shi chople idili xtill'lena' yell-lioni kat' bi inable lao Xa' Chioza', beena' zoa yabana', na' gone' daa inabilene'.

20 La' gana' chdop chope' wa shone' choe'la'ogake' nad', na'kz zoa' ladje'ka'.

21 Na' wbig' Pédrona' kwit Jesúza', chi'ene':

—Xan', ¿baḷ shii chiyal' yizi'xen' che bish' ljuwellaa shi bi dii mal chone' cha'? ¿Azeelo gall shii?

22 Na' che' Jesúza'ne':

—Aga nia' li' zeelo gall shii yizi'xeno' che bish' ljwello'na', san nia' li' chiyal' yizi'xeno' guiyon shin'chopə shii.\*

*Jempl che beena' bi bizi'xen che bish' ljwelle'na'*

<sup>23</sup> 'Yel' wñabia' che Chioza' zaklebin to ben' wñabia' beena' bizi' kwent che mecha' daa chal' wen llin che'ka'.

<sup>24</sup> Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb.

<sup>25</sup> Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoolo' na' yog'lol dii de che' kwenche yiyaxj xyana' daa llie'.

<sup>26</sup> Na' beena' chbag' mecha' bchek' xibe'na' lao xane'na', chonyeshee, chi'e: “Xan', wdapgach yel' chxenlall' cha', wiyixjkz' doxen daa chbagaa cho'.”

<sup>27</sup> Na' xane'na' biyeshile'ne', na' bene' ka'z doxen daa chalee che', na' bisane'ne'.

<sup>28</sup> Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene': “jBiyon xmechaa daa challoo!”

<sup>29</sup> Na' bchek' xib beena' lawe'na' na' chonyeshee, chi'ene': “Wdapgach yel' chxenlall' cha', wiyixjkz' doxen daa chbagaa cho'.”

<sup>30</sup> Na' bi goonile', san lii wyajtie' ji'ene' part kwenche wloogake'ne' lillyana' ax̄t ki yiyixjche' doxen daa chalee che'.

---

\* **18:22** Guiyon shin'chopə shii: bal' yishka' nyoj de dill' griegona' nan gall shii de guiyonshin'. Per chopten zejın toshiizi chiyal' yizi'xenko che ben'.



31 Na' ka ble'i wen llinka' sto ka bene', na' gokyesh'gakile' na' jayellgake' x̄ane'ka' doxen ka bene'.

32 Na' wizax x̄ane'na' le', chi'ene': “Ben' mal inleeb nako'. Nad' ben' ka'z doxen daa chaloo cha' daa benyeshoo lawa'.

33 Ka'kzan nan chiyal' yiyeshilo' bish' ljwello'na' chal' cho', ka biyeshid' li'.”

34 Na' daa le bllaachga x̄ane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

35 Na'ch goll Jesúza' legake':

—Ka'kzan goni X̄a'na' beena' zoa yabana' le' shi bi si'xen che ljwell-le do yichj do lall'le.

## 19

### *Bi chiyal' yilaa ljwell ben'ka' nkaa cheyin*

*(Mr. 10:1-12; Lc. 16:18)*

1 Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa llia shlaa yao Jordánna'.

2 Na' ben' zan zjanogake'ne', na' na' biyone' ben'ka' bi shao'.

3 Na' wbig' bal fariseoka' lao Jesúza' daa gok-lall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoollalee?

4 Na'ch che' Jesúza' legake':

—¿Abin' wlable gana' nan ka wxe wzil yell-lioni Chioza' bene' benecha', ben' byo na' noolə?

5 Na' wne': “Daan, wlaa ben' byona' x̄axneena' kat' ikaa che', na' soalene' xoolena' gakgake' toz'.”

<sup>6</sup> Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btile' legake'.

<sup>7</sup> Na' gollgake'ne':

—Na' ꞑbiche ben dii Moiséza' mandad kat' to ben' yilaa xoolena' chiyal' wlise' to yish dii we'n dill' bich nake' xoolena' wak yichoonene'?

<sup>8</sup> Na' goll Jesúza' legake':

—Ye! widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'.

<sup>9</sup> Nad' nia' le', shi nool chelena' bi chdalene' ben' yoblə, bi chiyal' yilaalene' na' yikaale nool yoblə, la' shi ka' gonle, na' chonle ka beena' zoalente xoolena' na' chdalene' noolə yoblə.

<sup>10</sup> Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

<sup>11</sup> Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n.

<sup>12</sup> La' de dii chllonan wshagna' ben'. Bal ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj benecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

*Jwa'gake' bi'do'ka' lao Jesúza'*

*(Mr. 10:13-16; Lc. 18:15-17)*

<sup>13</sup> Na' wyaj ben' jwa' bi'do' che'ka' lao Jesúza' kwenche wxoa neena' yichjb'ka' na' we'lwille'

Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'.

<sup>14</sup> Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chnabi'e loo yichjlall'do' ben'ka' nak ka legakb'.

<sup>15</sup> Na' ka biyoll bxoa na' Jesúza' yichj bi'do'ka', na'ch bizee ziyaje' gan yoblə.

*To bi' wew', bi' wni'a, bshaljem' Jesúza'*

*(Mr. 10:17-31; Lc. 18:18-30)*

<sup>16</sup> Na' bllin to bi' wew' lao Jesúza' che'b' le':

—Maestro, ¿bi dii wennan' chiya' gon' kwenche gat' to yel' mban cha' zejli ka<sub>ni</sub>?

<sup>17</sup> Na'ch goll Jesúza' leb':

—¿Bi<sub>che</sub> chnabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli ka<sub>ni</sub>, chiya' gono' diika' bllia Chioza' bia' goncho.

<sup>18</sup> Na' goll bi' wewaane':

—¿Bera diika' chiya' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljlalloo bizə gon ino' che ben'.

<sup>19</sup> Wdap balaan xaxnoona' na' goki bish' ljwello'na' ka chaki kwino'.

<sup>20</sup> Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

<sup>21</sup> Na' goll Jesúza' leb':

—Shi lekzilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna'

wyoon ben' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

<sup>22</sup> Na' ka beni bi' wewaa dga, nyesh' inleeb gokib' na' biza'b', la' bi' wni'a nleban nakb'.

<sup>23</sup> Na' goll Jesúza' ben'ka' nakgake'ne' txen:

—Dii li nia' le', lalj inleeb chonan che ben' wni'ana' yilline' yabana' gana' chñabia' Chioza'.

<sup>24</sup> Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chñabia' Chioza'.

<sup>25</sup> Na' bibangakile' ka wne', na' che' ljwellgake':

—¿Notg gak yillin lao Chioza', shka'?

<sup>26</sup> Na' bwia Jesúza' legake', na' golle':

—Ni to ben' yell-liona' bi' gak gone' dga, san Chioza' yog'lolte chak gone'.

<sup>27</sup> Na' che' Pédrone'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

<sup>28</sup> Na' che' Jesúza' legake':

—Dii li nia' le', kat' illin lla yikob yog'lol dii de, nad', Ben' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllintele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che ben' Israelka'.

<sup>29</sup> Na' nottez beena' ba wlej yichje' lille'na', ben' bisheeka', ben' zane'ka', xaxneeka', wa xiin xooole', wa yell-lio che' ni cha', Chioza'kzə wi'ene' dii zak' dii xen inleebch aga ka daa wlej yichje', na' lekzka' wi'ene' to yel' mban zejli kañi.

<sup>30</sup> Per ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gagkake' ben' zakii.

## 20

*Jempl che wen linka'*

<sup>1</sup> Na' wna Jesúza':

—Yeł' wñabia' che Chioza' chzaklebin daa gok che to xan yell-lio beena' naz yag uvana'. Na' shzildo' wzee zeje' zjtilje' wen linka' kwenche lljengake' llinna' gana' naze' yag uvaka'.

<sup>2</sup> Na' bgaangake' dill' chixje' legake' che lla, na'ch bselee legake' gana' lljengake' llinna'.

<sup>3</sup> Na' ba gok shon gor chon beñ' nechka' llinna' ka wyaje' dii yoblə gana' chak yaana', na' ble'ile' lle' beñ' bibi llin de gongake'.

<sup>4</sup> Na'ch chi'e legake': “Łi shaj ĺi lljen llinna' gana' naz' yag uvana' na' chixj' le' daa chidoł'le.” Na' wza'gake' zejgake' llinna'.

<sup>5</sup> Na' do ka gobill wizaje' dii yoblə, na' lekzka' chida shonə, bizllelile' beñ' yoblə lljengake' llin che'na'.

<sup>6</sup> Na' do ka chida gay', wizaje' dii yoblə na' bizle'ile' beñ' lle'zgake'. Na'ch chi'e legake': “¿Bi che bi benle llinna' ñaanlla?”

<sup>7</sup> Na' goll beñ'ka'ne': “Ła' ni to kono bche' neto' llinna'.” Na' golle' legake': “Łi shaj, lla, ĺi lljen llinna' gana' naz' yag uvana'.”

<sup>8</sup> Na' ka wzeles yela' na' che' xan yag uvana' beena' ngoo lo nee llinna': “Biyax wen linka' na' wdixjgake'. Zigaate beñ'ka' zi' wyoo llinna' chixjo', na' yiyoll-lin beñ'ka' wzolo nech.”

<sup>9</sup> Na' bene' kon ka goll xane'na', na' wdixje' zigaate beñ'ka' wyoo llinna' do ka chida gay'. Na' wdixje' to toe' che llakzə.

10 Na' ka gol' chixje' beṅ'ka' wyoogake' llinna' shzildo', gokgakile' wxoache' laxje'ka'. Per bich bi bxo'e' san che llachokzə wdixje' legake'.

11 Na' ka ba nox'gake' laxje'ka', wzologake' biz chon chnagake' che xan llinna',

12 na' gollgake'ne': “Do lla wzento' lo bana' ben-to' xshino'na' na' toz ka wdixjo' neto' len beṅ'ka' zi' wyoo, na' zi' tgorchga bengake' llinna'.”

13 Na' che' xan llinna' toe': “Bish'dawaa, aga bi laxjo' chzeshaa. ¿Aaga bgaancho dill' che llan chixj' li'?”

14 Wkaa laxjo'na', na' biyaj. Nad' cheenid' chixj' beṅ'ka' wyoo llinna' ba wle'ch ka to daa ba wkoo.

15 Jwayishaz nad' bi gonid' xmechaa. ¿Anti chakziilo' daa chonid' beṅ' wen?”

16 Na' ka wde bzoa Jesúza' jempli, na' chi'e beṅ'ka':

—Ka'kzan beṅ' zan nakgake' beṅ' zakii, wllin lla bich bi sak'gake', na' beṅ' zan bi nakgake' beṅ' zakii, wllin lla gakgake' beṅ' zakii.

*Sto shii wdixjee Jesúza' witgake'ne'*

*(Mr. 10:32-34; Lc. 18:31-34)*

17 Ka ziyaj Jesúza' Jerusalénna' wñie' to beṅ'ka' shllinžə, chi'e:

18 —Naa ba ziyajcho Jerusalénna', gana' gongake' nad', Beṅ' Bsel' Chioza' yell-lioni, lo na' bxo'zka' chñabia' na' lo na' beṅ'ka' chli' chsedi leya', na' wchoglogake' witgake' nad'.

19 Na' gongake' nad' lo na' beṅ'ka' bi nak beṅ' Israel kwenche wtitgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj beṅ' wetka'.

*Daa wñab xña' Jacóbona' len Juanna' lao Jesúza'  
(Mr. 10:35-45)*

<sup>20</sup> Na' Jacóbona' len Juanna', beñ'ka' nak xiin Zebedewa', wbig'lengake' xñeeka' kwit Jesúza', na' xñeeka' bçhek' xibe'na' lawe'na' wñabile'ne' to goklen.

<sup>21</sup> Na' goll Jesúza'ne':

—¿Bera goklenan cheenilo' gon' çho'?

Na' golle'ne':

—Cheenid' gongacho' goklen kweko' bi' çha'ki shłaa wej kwito'na' kat'ka' illin lla inabi'o.

<sup>22</sup> Na' goll Jesúza'ne':

—Ni bi nezile bin chñable. ¿Awizoile wtil-le yel' zak'zi'na' ka daa wtil' na' gak çhele ka daa gak çha'?

Na' gollgake'ne':

—Wizokzinto'n.

<sup>23</sup> Na' goll Jesúza' legake':

—Lekzile wtil-le ka daa wtil', na' gak çhele ka daa gak çha', per daa nale kwe'le shłaa wej kwitaa bi nak lo na' gon' ka nale, san Xa'nan' ba mbeje' ben'ka' wi'en.

<sup>24</sup> Na' beñ'ka' zi shi, bllaagake' Juanna' len Jacóbona' daa wñabgake' kwe'gake' kwit Jesúza'.

<sup>25</sup> Na' bitop Jesúza' legake', na' chi'e:

—Nezkzile zoa beñ' wñabia' na' beñ' zakii çhe to to yell na' chongakile' kon daa nazan çhegake' beñ' yell çhe'ka'.

<sup>26</sup> Per aga kan' chiyał' gonle. Shi nole cheenile gake beñ' mbejlawin chiyał' gake ka to beñ' chon xshin beñ'.

<sup>27</sup> Na' shi nole cheenile gake beñ' zakii, chiyał' gake ka beñ' ndoo lla yel chone' xshin beñ'.

28 Ka nak nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'ni kwenche yisla' ben' zan lao saaxya che'ka'.

*Jesúza' biyone' chop ben' lchol*

(Mr. 10:46-52; Lc. 18:35-43)

29 Na' ka biza' Jesúza' yell Jericóna' len ben'ka' nakgake'ne' txen, ben' zan inleeb janogake'ne'.

30 Na' cho'a neza' chi' chop ben' lchol, na' ka bengakile' bide Jesúza' kwite'ka' na'ch besyaagake', che'gake':

—iXan', xiin dia che dii Daví, biyesh'lall'gachi neto'!

31 Na' ben'ka' zejlen Jesúza' bsheshlengake' legake' kwenche nan kwe'gake' lliz, per zizikla besyaachgake', che'gake':

—iXan', xiin dia che dii Daví, biyesh'lall'gachi neto'!

32 Na'ch wlez Jesúza' na' wnie' ben' lcholka', na' chi'e legake':

—¿Beran cheenile gon' chele?

33 Na'ch che' ben' lcholka'ne':

—Xan', bengach ka ile'into'.

34 Na' biyesh'lallii Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

## 21

*Bllin Jesúza' Jerusalénna'*

(Mr. 11:1-11; Lc. 19:28-40; Jn. 12:12-19)

1 Na' ka ba zoa yillingake' Jerusalénna', bllingake' cho'a yell Betfagéna' daa lia kwit Yaa



Olívoza'. Na' wlej Jesúza' chop ben'ka' nakgake'ne' txen na' bselee legake' yella'.

<sup>2</sup> Na' chi'e legake':

—Li shaj yella' daa lia shlaana'. Na' ile'ile to burr ba noolə da'b yag na' nche' to xiindo'b. Na' wsell-leb wche'legakb nilə.

<sup>3</sup> Na' shi no bi ina le', na' ye'lene': “Xannto'nan' chyalljile' legakb, na' lii yidsantento'gakb.”

<sup>4</sup> Na' daa gok ka', billinin ka' bzej dii beena' wdixjee daa goll Chioza'ne' daa wne':

<sup>5</sup> Li ye' ben'ka' lle' yell Siónna':

“Li wwia, ba za' ben' wñabia' chelena',  
nake' ben' gaxjlall' na' llie' to burrdo';  
xiin to ba choa' yoa'.”

<sup>6</sup> Na' wza' ben'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka' golle' legake'.

<sup>7</sup> Na' jxi'gake' burra' len xiinba' na' bche'gake' legakb kwit Jesúza'. Na'ch bxoogake' xe'ka' koll'bka', na'ch wllia Jesúza'b zeje' Jerusalénna'.

<sup>8</sup> Na' ben' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'.

<sup>9</sup> Na' ben'ka' llialo lao Jesúza', na' ka'kzə ben'ka' nogake'ne', wzologake' chosyaagake', nagake':

—iWe'la'ocho beeni nak xiin dia che dii Davina!  
iGonleeyshga Xancho Chioza' beeni ba bselee! iLi da we'la'ocho Chioza' zoa yabana'!

<sup>10</sup> Na' ka' wyoo Jesúza' yell Jerusalénna', na' yog' ben'ka' lle' na' bllesh bcheengake', nagake':

—iNoraz beeni bla' ni, lla?

<sup>11</sup> Na' ben'ka' che'gake':

—Beenin Jesúza' ben' Nazareta' yell daa mbani Galileana', beena' chyixjee daa che' Chioza'ne'.

*Bishesh Jesúza' ben'ka' chit' chde lesh' chyoodo'na'*

*(Mr. 11:15-19; Lc. 19:45-48; Jn. 2:13-22)*

<sup>12</sup> Na' wyoo Jesúza' lesh' chyoodo'na' na' bisheshe' yog' ben'ka' chit' chde na'. Na'ch bishi'e mes che ben'ka' chsha' mecha' na' bzoles bzolline' gana' chi' ben'ka' chit'gake' palomka'.

<sup>13</sup> Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill ben' nad'”, na' le', ba nonzlen ka to ga chdop chllag wban.

<sup>14</sup> Na' shlak zoa Jesúza' yoodo'na', ba ben' lchol na' ben' bi chak sa'gake' wen bllingake' lawe'na', na' biyone' legake'.

<sup>15</sup> Na' bxozka' chnabia' na' ben'ka' chli' chsedi leya' le blaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “iWe'la'ocho beeni nak xiin dia che dii Davina!”

<sup>16</sup> Na' gollgake' Jesúza':

—¿Achenilo' ka na bi'do'ka'?

Na' chi'e legake':

—Awe, chenkzid'. ¿Abin' wlable Cho'a Xtill' Chioza' gana' na:

Chchino' cho'a loll' bi' xkwid'do'ka' na' bdo'ka' ni chall' chxop

kwenche chol chnegakb' li' ka chiya' we'la'o ben' li'?

<sup>17</sup> Na'ch bicheje' ladj ben'ka', na' bizee yell Jerusalénna' ziyaje' yell Betániana' gana' wdie' yel.

*Jesúza' bene' ka wbill to yag yixwew*

*(Mr. 11:12-14, 20-26)*

<sup>18</sup> Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'.

<sup>19</sup> Na' ble'ile' to yag yixwew dii zoa cho'a neza', na' jawie' shi llian. Per zeelo xlaguiinna'z llia. Na' golle'n:

—iBatch kwio' yixwewa'!

Na' katena' lii wbillte yaga'.

<sup>20</sup> Na' ka ble'i ben'ka' nakgake'ne' txen ka gok, le bibangakile', na' che'gake'ne':

—¿Berache lii wbilltelikazə yag yixwewa'?

<sup>21</sup> Na'ch che' Jesúza' legake':

—Dii li nia' le', shi nonlilall'le Chioza' na' bi gakchoplall'le, aga daazan gak gonle, san wakte ye'le yaani: “Bkwas, na' jsoa loo nisdona'”, na' gak ka ye'len.

<sup>22</sup> Na' yog' daa inabile Chioza' ka we'llwill-lene' gonkze'n kon shi nonlilall'lene'.

*Yel' wnabia' che Jesúza'*

*(Mr. 11:27-33; Lc. 20:1-8)*

<sup>23</sup> Na' wyaj Jesúza' dii yoblə yoodo'na' kwenche jali' jasedile' ben'ka'. Na' shlak chli' chsedile' legake', bxoza' chnabia' na' ben' golka' chnabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben li' yel' wnabia'na'?

<sup>24</sup> Na' goll Jesúza' legake':

—Lekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens cheyi chon' yog' diiki.

25 Li inashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lezgake', nagake':

—Shi ye'chone' Chioza' bseleene' na'ch ine' cho': “¿Biche bi wyajle'le che', lla?”

26 Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lole' chajle'gake' Chioza' bselee Juanna' kwenche bidtixji'e daa golle'ne'.

27 Na'ch che'gake' Jesúsza':

—Bi nezinto' non bsel' dii Juanna'.

Na' goll Jesúsza' legake':

—Lekzka' nad', aga wnia' le' nora lsens cheyin chon' diiki.

### *Jempl che chop xiin ben'*

28 Na' goll Jesúsza' legake':

—¿Bi ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.”

29 Na' che' xiine'na'ne': “¿Bi sha'!” Per na'tech biyajib' na' wyajkzb' jem' llinna'.

30 Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'.

31 Li inashki, ¿nora bi'ka' chop ben ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúsza' legake':

—Dii li nia' le', beṇ' wiçhixjka' na' noolə wdaka', lelgaken' zigaate we'gake' latj inabia' Chioza' legake' aga ka le'.

<sup>32</sup> La' ka bid Juanna' bchoe' beṇ' nisa', bidzajni-ile' le' ka chiyal' soa kwezle, per le' aga wyajle'le che', lete beṇ' wiçhixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

*Jempl che wen llinka' nak beṇ' mal*  
(Mr. 12:1-12; Lc. 20:9-19)

<sup>33</sup> 'Li wzenag jempli sto. Wzoa to beṇ' biyaze' yag uva lo yell-lío che'na' na'ch wlo'en leej, na'tech beshawee to ga wsigake' uvaka'. Na' lekzka' bene' to yoo sibə gana' kwia beena' gap wwie'n.

'Na'tech bene'n lo na' to çhop beṇ' na' wzee zeje' zit'.

<sup>34</sup> Na' ka gol' yishibgake' uvaka', na'ch bselee to çhop wen llin che'na' gana' lle' beṇ'ka' chapgake' yag uvaka' kwenche lljaxi'gake' uvaka' daa chidolee.

<sup>35</sup> Per ka bllingake' gana' lle' beṇ'ka' chapgake' yag uvaka', na'ch bex'gake' beṇ'ka' bllin, toe' bet wdingake'ne', na' stoe' bettekzgage'ne' na' beena' sto btakwgake'ne' yaja'.

<sup>36</sup> Na'ch bsel' xan yag uvaka' zanch wen llin che'ka' aga ka to beṇ'ka' bselee dii nech, per beṇ'ka' chap yag uvaka' bengakile' legake' ka bengakile' beṇ' nechka' bllin.

<sup>37</sup> 'Na'ch xan yag uvaka' bselee kwinkz xiine'na', chakile': "Wapgake' balaan bi' cha'ni na' we'gake'b' daa chidolaa."

38 Per beṅ'ka' chap yag uvaka' ka ble'gakile' xiine'na', na'ch che' l̄jwelle': "Bi'nin xiin x̄an yag uvaki na' leban' yigaan̄lem' yog' dii nape'. Li da witchob' kwenche yigaan̄lencho daa gaki cheb'."

39 Na'ch beṅ'gake'b' bibejgake'b' gana' lle' yag uvaka' na' betgake'b'.

40 Na' Jesúza' chi'e beṅ'ka' lle' na':

—¿Nakra ka chakile gon x̄an yag uvaka' che beṅ'ka' chapgake'n ka illine' kwine'?

41 Na' che' beṅ'ka':

—Ba nakten wite' legake' na' bi yiyeshile' legake' daa nakgake' beṅ' mal. Na' yiyone' yell-lío che'na' lo na' beṅ' yoblə, beṅ' yiyoe'gake'ne' daa chidolee kat' yishibgake'n.

42 Na' goll Jesúza' legake':

—¿Abigaṅ' wlable Cho'a Xtil' Chioza' gana' na: Yaja' daa bi wyoolall' wen yooka', leyen'lannan' yaja' daa ba nchejcha yoona'. Dgan ben X̄ancho Chioza' na' nakan to dii yibanicho?

43 Daan nia' le', kon ka gon x̄an yag uvaka' yiyone' yell-lío che'na' lall' na' beṅ' yoblə, beṅ' gongake' ka cheenile', ka'kzan gon Chioza' chele. Kwej yichje' le', na' beṅ'ka' wzenaggake' che', si'gake' banez yel' wṅabia' che'na'.

44 Na' ka nak yaja', nottezə beṅ' lljchaze' lawinna' kwiayee, na' shi idakwan beṅ', axt wshoshjan le'.

45 Na' ka biyoll bzenag b̄xozka' chṅabia' na' fariseoka' jemplki bzoa Jesúza', na'ch gokbe'gakile' chegake'n chṅie'.

46 Na'ch goklall'gake' gox'gake'ne', per bi biyaxj-gakile', la' bllebgake' beṅ'ka' lle' na' daa chajle'gake' Jesúza' nake' to beṅ' chyixjee daa che' Chioza'ne'.

## 22

*Jempl che to wishagna'*

<sup>1</sup> Na' Jesúza' bseesile' legake' sto jempl, chi'e:

<sup>2</sup> —Yel' wñabia' che Chioza' chzaklebin to ben' wñabia', ben' bene' to lñi che xiine'na' ka bshagna'b'.

<sup>3</sup> Na' bselee wen llin che'ka' lljanegake' ben'ka' ba bye', per ben'ka' bye' bi goongakile' shajgake'.

<sup>4</sup> Na'ch bizselee zi shkwen wen llin che'ka' chi'e legake': “Li lljell ben'ka' ba bya' yid lñi che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho.”

<sup>5</sup> Per ben'ka' ba bye' bi bengake' kwent daa goll wen llinka'. Toe' wyaj jawia' yell-lío che'na' na' stoe' wzee zeje' delgens che'na'.

<sup>6</sup> Na' ben'ka' sto bex'gake' wen llinka' na' biya dii bengakile' legake' axt ka witgake'.

<sup>7</sup> Na' le bllaachga ben' wñabia'na', na'ch bselee soldad che'ka' kwenche jetgake' legake' na' bzey-gake' yell che'ka'.

<sup>8</sup> Na'ch chi'e wen llin che'ka' sto: “Ba gok daa yeej gaocho, na' wentelan bi wlen ben'ka' bya'.

<sup>9</sup> Na' li shaj lyell na' li wche' kon no ben' yillagle tneza' kwenche yidgake' yeej gaogake'.”

<sup>10</sup> Na'ch wza' wen llinka' zejgake', na' jxi'gake' kon no ben' billaggake', ka ben' wen ka ben' mal. Na' billa'cha lill ben' wñabia'na'.

<sup>11</sup> Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiyal' gakwe' gana' chak wishagna'na'.

12 Na' goll ben' wnabia'na'ne': "Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?" Na' beena' bikzə bi billet-lallee yeene'.

13 Na'ch che' ben' wnabia'na' ben'ka' chde yel' wawa': "Li wchej ni'a na' beeni na' li yibeje' na' li wzalee gana' shgasj shchol, gana' kwellyeshee na' gaouxaj leye'na' daa le gakshejlallee."

14 La' ben' zan nak ben'ka' chax chnab Chioza', per balchgagake' kweje' gakgake' lall' nee.

*Wnabgakile' Jesúza' shi chiyal' chixjgake' daa chnab ben' wnabia'na'*  
(Mr. 12:13-17; Lc. 20:19-26)

15 Na' biza' fariseoka', na' wloogake' xnezi naklə gongake' kwenche we' Jesúza' dill' dii wchixa'n le'.

16 Na'ch bsel'gake' bal ben'ka' nakgake'ne' txen na' zi bal ben'ka' nak Heródeza' txen kwenche wyajgake' lao Jesúza' na' jellgake'ne':

—Maestro, nezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' no nakgake'.

17 Daan cheeninto' inagacho' neto' nak ka chak-ilo': ¿Achiyal' chixjcho daa chnab ben' wnabia' Césara', anti bi chiyal' chixjchon?

18 Na' gokbe'i Jesúza' aga do lall'gaken' goll-gake'ne' ka', na'ch chi'e legake':

—Le' ben' wxiye', aga dii leilen nale ka'.

19 Li wli'shki nad' to mech daa chyixjile ben' wnabia'na'.

Na' be'gake'ne' to mech.

20 Na' goll Jesúza' legake':

—¿Nora cho'alawin na' no leyin da' lee mechí?



21 Na'ch che'gake'ne':

—Che beṅ' wṅabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

22 Na'ch bibangakile' daa goll Jesúza' ka'. Na' biza'gake' kwite'na' ziyajgake'.

*Saduceoka' wṅabgake' nak gak kat' yiban beṅ' wetka'*

*(Mr. 12:18-27; Lc. 20:27-40)*

23 Na' lo llana'kzə saduceoka', beṅ'ka' bi chajle'gake' yiban beṅ' wetka', wyajgake' lao Jesúza', na' wṅabgakile'ne':

24 —Maestro, dii Moiséza' wne' shi to beṅ' byo guete' na' kono xiine' wzoa, beṅ' bisheena' chiyal' yikee xool dii beṅ' bisheena' kwenche soa xiin dia che dii beṅ' weta'.

25 Na' ki gok che gall bish' beṅ' nakgake' neto' txen. Beṅ' necha' bshagnee, na' wite' na' kono xiine' wzoa, na' beṅ' bishee, beṅ' wchopina', bikee xoolena'.

26 Na' lekzka' wit beṅ' wchopina' na' kono xiine' wzoa. Na' ka'kzə wit beṅ' wyonina' na' ax̄t biyate beṅ'ka' gall wit. Na' ni togake' bi wzoa xiingake'.

27 Na' ka wde wit yog'lole' na'ch lekzka' wit noola'.

28 Na' kat' yiban beṅ' wetka', naa, ¿nora beṅ'ka' gall bish' gaki xool' noola'? la' yog'lolen' wkaa-gake'ne'.

29 Na'ch che' Jesúza' legake':

—Naklejjilen daa bi nezile ka na Cho'a Xtill' Chioza', na' ka nak yel' wak che'na'.

<sup>30</sup> La' kat' yiban beṅ' wetka', koch no yikaa ljjwellin, ni koch no wit' wde xiṅin, san yiyakgake' ka anjlka' lle' yabana'.

<sup>31</sup> Na' ka nak daa yiban beṅ' wetka', ṅaa, ḷabin' wlable daa wna kwin Chioza', gana' nan:

<sup>32</sup> “Nad nak' Chios che Abrahama', Isaaca' na' Jacoba'”? Na' bi nake' Chios che beṅ' wet, san nake' Chios che beṅ' ban, la' lao Chioza' mban ben'ki.

<sup>33</sup> Na' ka beni beṅ'ka' lle' na' daa wna Jesúza', le bibangakile' ka chli' chsedile'.

*Daa llialute daa bllia Chioza' bia' goncho*

*(Mr. 12:28-34)*

<sup>34</sup> Ka wṅezi fariseoka' ba wleklli Jesúza' sadućeoka', na'ch wyajgake' kwite'na'.

<sup>35</sup> Na' to beena' chli' chsedi leya' wṅabile' Jesúza' kwenchezə wchixeene', chi'e:

<sup>36</sup> —Maestro, ḷberan llialute nllia leya' bia' goncho?

<sup>37</sup> Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajniilo'.”

<sup>38</sup> Dgan liizelozi chonte na' llialon lawi yog' diika' nllia leya' bia'.

<sup>39</sup> Na' de wchopina' nakan katekzə dii necha', na' nan: “Chiyal' gakilo' bish' ljjwello'ka' ka chaki kwino'.”

<sup>40</sup> Na' diiki chop chejin doxen ka na leya' len diika' bzej dii beṅ'ka' wdixjee daa goll Chioza' legake'.

*Crístona' nake' xiṅ dia che dii Davina'*

*(Mr. 12:35-37; Lc. 20:41-44)*

<sup>41</sup> Na' shlak ndop nllag fariseoka' kwit Jesúza'

<sup>42</sup> wñabile' legake':

—¿Nak ka chakile che Crístona', beena' inabia'?  
¿No xiin dia cheyin nake'?

Na' che'gake'ne':

—Xiin dia che dii Davinan'.

<sup>43</sup> Na' che' Jesúza' legake':

—Na' ¿berache ben Espíritu Sántona' ka goll dii Davina'ne': “Xan”’? La' kin na daa bzeje':

<sup>44</sup> Xancho Chioza' golle' Xan'na':

“Wche' kwit' de shlini,

shlak wzoa' xñi'ona' ben'ka' chakzbani li'.”

<sup>45</sup> Na' shi kwin dii Davina' golle' Crístona': “Xan”,  
¿berache nazle nake' xiin dia che', shka'?

<sup>46</sup> Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

## 23

*Jesúza' chawe' xya che fariseoka' na' ben'ka' chli' chsedi leya'*

*(Mr. 12:38-40; Lc. 11:37-54; 20:45-47)*

<sup>1</sup> Na'ch Jesúza' golle' ben'ka' nakgake'ne' txen len ben'ka' lle' na', chi'e:

<sup>2</sup> —Ben'ka' chli' chsedi leya' na' fariseoka' nak lo na'gake' wzajni'gakile' ben' daa bzej dii Moiséza'.

<sup>3</sup> Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle.

<sup>4</sup> Dii zan dii che'gake' ben' chiyal' gongake', na' nakan ka to yoa' xen dii chwa'gake' ben' dii kono so saki, na' legake' bikz bi chda na'gake' kwenche gaklengake'.

5 Na' yog' diika' chongake' chongake'n kwencheza ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chche' neeka' chongake'n dii xench aga ka che ben' yoblə, na' chtonchgage' lox xe'ka' aga ka che ben' yoblə.  
6 Na' kat' chajgake' lnika', le chibagakile' kwe'gake' gana' chbe' ben'ka' zakii, na' lekzka'yen' chjengake' gana' chdop chillaggake' choe'lwillgake' Chioza'.

7 Na' le chibagakile' gap ben' legake' balaan kat' chillaggake' legake' ga lle' lla' ben' na' ye'gake' legake': “maestro”.

8 'San le', bi we'le latj ina ben' le' “maestro”, la' toz nadaan nak' Maestro chele na' yog'le nakle ka bish' ljwellin.

9 Na' kono ye'le “xa” lo yell-lioni, la' toz Chioza', beena' zoa yabana', nake' Xale.

10 Ni bi we'le latj inagake' le' “maestro”, la' toz nad', Cristo, nak' Maestro chele.

11 La' beena' nak ben' gaxjlall' na' chaklene', beenan' nake' ben' zak'chi ladjlena'.

12 Na' beena' chon kwine' ben' zakii, Chioza' gone'ne' ben' bibi zakii. Na' beena' chon kwine' ka ben' bibi zakii, Chioza' gone'ne' ben' zakii.

13 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chsej chllonle gombia' ben' yel' wñabia' che Chioza', na' ni bi choe'le latj inabi'e le', ni bi choe'le latj che ben'ka' cheengakile' inabi'e legake'.

14 'iNyesh'laz gak chele, le' chli' chsedile' leya' na' le' fariseo, daa nakle ben' wxiye'! La' chkaale lill nool wizebka' na' choe'lwill-le Chioza' ssha nleeb

kwenche gaki beṅ' nakle beṅ' wen. Na' daa chonle ka', Chioza' wsak'zi'che' le' aga ka beṅ' yoblə.

<sup>15</sup> ;iNyesh'laz gak chele, le' chli' chsedile' leya' na' le' fariseo, daa nakle beṅ' wxiye'! Chdale to ni to na' chyilje beṅ' wsede' daa chli' chsedile. Na' kat' chllelilene' chónlene' beṅ' malch aga ka le' na' chlliayi'chlene' axt choplə ka to ba mbiayi'le.

<sup>16</sup> ;iNyesh'laz gak chele, le' nakle ka beṅ' lchol, beṅ' chakile' wak wchi'e sto beṅ' lchol! La' nale: “Shi to beṅ' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n.” Na' chiznale: “Shi wzoe' de taschiw ora' daa de loo yoodo'na', na'chan chiyal' gone' daa bchebe'.”

<sup>17</sup> ;Le' nakle ka beṅ' lchol daa bi nteyile! ;Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios.

<sup>18</sup> Na' lekzka' chiznale: “Shi to beṅ' wchebe' to dii gone' na' wzoe' de taschiw gana' chzeygake' bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiyal' gone' daa bchebe'.”

<sup>19</sup> ;Le' nakle ka beṅ' lchol daa bi chajniile! ;Abi chakbe'ile' gana' chzeygake' bayixaa chzanile we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios.

<sup>20</sup> La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'.

<sup>21</sup> Na' beena' chcheb wi'e to dii wi'e na' chzoe'

de taschiw yoodo'na', aga toz yoodo'nan' chzoe' de taschiw, san lekzka' len Chiozan' daa nakan lill xlatje'.

22 Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chnabi'e.

23 'iNyesh'laz gak chele, le' chli' chsedile leya' na' le' fariseo, daa nakle ben' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliatotech daa nllia Chioza' bia' goncho. Dii lliatotech goncho daa nak shli, yiyesh'lallichō ben', na' gonlilall'cho Chioza' do yichj do lall'cho. Diikin chiyal' gonle, per lekzka' bi chiyal' wsanle gonle diika' sto.

24 'iLe' nakle ka to ben' lchol ben' chakile' wak wchi'e sto ben' lchol! Na' chonle ka to ben' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

25 'iNyesh'laz gak chele, le' chli' chsedile leya' na' le' fariseo, daa nakle ben' wxiye'! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki ben' nakle ben' wen per le chzelall'le bi dii de che ben' na' chbanlen.

26 Na' le' fariseo, i nakle ka ben' lchol daa bi chajniile! Li yiyaj yileni daa chonle kwenche gakte ben' wen ka chaki ben' nakle, na'ch gakte ka xig' yeen dii nxi nyech ka loolə ka koll'lin.

27 'iNyesh'laz gak chele, le' chli' chsedile leya' na' le' fariseo, daa nakle ben' wxiye'! La' nakle ka to lill ben' wet dii nyebgake' yiw' na' nla' lawinna'

xochi, per lo'inna' lle' lla'n llit wetka' na' bichlæ dii zban.

<sup>28</sup> Kan' nakle le' daa chonle ka chaki ben' nakle ben' li ben' shao' per loo yichjlall'do'lena' lle' lla'n de wxiye' na' dii mal.

<sup>29</sup> 'iNyesh'laz gak chele, le' chli' chsedile leya' na' le' fariseo, daa nakle ben' wxiye'! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochlæ ben'ka' gok ben' li ben' shao'.

<sup>30</sup> Na' nale: "Shel'ka' neto' ba zoanto' kana' wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'."

<sup>31</sup> Per kwinkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'.

<sup>32</sup> iNa' li yisyoll li yisto li gon dii mala' daa bi biyoll gon dii xozxto'leka'!

<sup>33</sup> iLe' nakle ka bel znia! Bi gakile shi wilale lo yi' gabila'.

<sup>34</sup> Daan wselaa ben' chixje'gakile' le' daa yepga-kee. Wselaa ben' sin' ben' chajni kwenche wli' wsedgakile' le' cho'a xtilaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'llwill-le Chioza', na' zi balgake' lljalagle to to yellka' gana' illingake'.

<sup>35</sup> Na' daa gonle ka', yidobile yel' wit che yog'lol ben' li ben' shao'ka' bet dii xozxto'leka', wzolozin dii Abela' beena' gok ben' li ben' shao', axt dii Zacaría'za', xiin Berequí'aza', beena' betgake' latja' daa de cho'a yoodo'na', kwit gana' chzeygake' bayix'ka'.

<sup>36</sup> Dii li nia' le', ka le' zoale naa chidol'le sak'zi'le che yog' daa ben dii xoxto'leka'.

*Jesúza' gokyeshile' che ben' Jerusalénka'*  
(Lc. 13:34-35)

<sup>37</sup> ¡Le' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena! ¡Zan shii goklallaa gon' chele ka chon jeda' chiyellb xiindo'bka' xan xilba', na' bi goklall'le!

<sup>38</sup> Na' naa ba wlej yichj Chioza' le', na' gani lle'le idesh iloan.

<sup>39</sup> Na' nia' le', bich ile'ile nad' axt kat'ch illin lla inale: “¡Gaklenshga Xancho Chioza' beeni ba bselee!”

## 24

*Jesúza' bi'e dill' yiyinj yoodo'na'*  
(Mr. 13:1-2; Lc. 21:5-6)

<sup>1</sup> Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'.

<sup>2</sup> Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljwellin.

*Diika' gak kat' ba zoa te che yell-lioni*  
(Mr. 13:3-23; Lc. 21:7-24; 17:22-24)

<sup>3</sup> Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' ben'ka' nakgake'ne' txen na' xochitezə wñabgakile'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?



4 Na'ch che' Jesúza' legake':

—Wsak'yen'gale kwenche kono siye'z le'.

5 La' ben' zan ichej inazgake': "Nadaan Crístona!"  
Na' ben' zan shajle'.

6 Na' yenile chak wdil to ni to na', per bi gakshe-  
jlall'le. La' dii chiyal'kz gakan, per aga ba bllin lla  
te che yell-lionin kat' ba chak ka'.

7 La' yidil-len ljwell yellka' na' ben' wnabia'ka'  
yidil-len ljwellgake', na' kwe' yillwe', kwe' wbin,  
na' zan yell gak bedxo' wal.

8 Kat' ba chak diiki, shinz chzolo ka nak daa yen  
ile'i ben' yell-lioki.

9 Na'ch gongake' le' lo na' ben'ka' wchi' wsak' le',  
na' witgake' le', na' yog' ben' yell-lioki gaksban-  
gakile' le' daa nonlilall'le nad'.

10 Na' kat' ba chak diiki ben' zan bich  
gonlilall'gake' nad', na' gaksbani ljwelle' na' gon  
ljwellgake' lo na' ben' malka'.

11 Na' ichej zan ben' gonzgake' ka ben' chyixjee  
daa che' Chioza' legake', na' ben' zan shajle'.

12 Na' daa kwe'chachga dii mala', ben' zan bich  
gakgakile' Chioza' ni bish' ljwelle'ka'.

13 Per beena' soachech gonlilallee nad' axt ka  
yiyoll diika' yen ile'ile', beenan' gat' to yel' mban  
che' zejli kañi.

14 Na' ka nak dill' wen dill' kob che yel' wnabia'  
che Chioza', chonan byen lltixjeegake'n doxen  
yell-lioni kwenche yog'lol ben' yengakile'n, na'  
kana'chan te che yell-lioni.

15 'Dii Daniela', beena' wdixjee daa goll  
Chioza'ne', bzeje' cheyi daa soa loo yoodo'na' daa  
wnitan balaan cheyinna', na' chiyal' sele wneyi bin  
zejin. Na' kat' ile'ile'n loo yoodo'na'

16 kanan' ben'ka' zoa Judeana' chiyal' wxonjgake' shajgake' yaa yaoka'.

17 Na' beena' llia koll' lille'na' ni bich gal' yiyetje' lljaleje' dii de loo yoo lille'na'.

18 Na' beena' chda lyixaa ni bich gal' yiyaje' lille'na' lljaxe' xe'na'.

19 iNyesh'laz gak che noolka' noa' na' noolka' chwall' chxop llana' gak ka'!

20 Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaancha.

21 La' yel' zak'zi' wal inleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde goka kochno yen ile'i ka len.

22 Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

23 Na' llaka' chak ka' shi no ina le': "Li wwia, ni ze Crístona'", wa ine' le': "Na' zie'", bi shajle'le.

24 La' wchej ben' siye'gake', inazgake': "Nadaan Crístona'", wa "Nadaan chyixji'a daa na Chioza'". Na' lekzka' gongake' dii gonan ka yibani ben', na' gongake' yel' wak xen kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee.

25 Na' naa ba bzenid' le' ka nak daa zi' gak.

26 Daan shi no inaz le': "Crístona' zoe' latja' gana' bibi chashj chleb'", bi shajle; wa shi no inaz le': "Loo yoonaa' zoe'", bi shajle'le.

27 La' kat' nad', Ben' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'.

28 La' gana' de ba weta' nan' chllag llodka'.

*Kat' yiyed Jesucristona'*

*(Mr. 13:24-37; Lc. 21:25-33; 17:26-30, 34-36)*

29 'Na' kate yiyoll yel' zak'zi'ka', lii gakte shgasj shchol' lao wbillā' na' bewaa bich wzeeni'n na' beljka' ixopgakan, na' yog' diika' lia xan yabana' inibgakan.

30 Na'ch yog' ben' lle' yell-lioni ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' ben'ka' lle' doxen yell-lioni kwellyesh'gake'.

31 Na' ka kwell trompeta' zillj wselāa anjl cha'ka' zbii zkaan yell-lioni kwenche yitopgake' ben'ka' wlej Chioza' nak lall' nee.

32 'Na' li wwia ka chak che yag yixwewa': kat' ba chzolo chibia xlaguiinna', na' chakbe'ile ba zoa yiyoo la'o linna'.

33 Ka'kzan, kat' ile'ile ba chak yog' diika' ba wnia' le' gakə, na' gakbe'ile ba zoa gaoshosh te che yell-lioni.

34 Dii li nia' le', aga ba wit ben'ki zoa naa kat' gag yog' diiki lia bia' gakə.

35 Yabana' na' yell-lioni te chegakin, san cho'a xtillaana' biga te cheyin na' gag ka nan.

36 'Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

37 'Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə.

38 La' ben'ka' wzoa kana' zi' gag yej ziw' wala', cheej chaogake', na' chshagna'gake' na' no

choe'gake' yel' wishagna' che xiine'ka' axt llana' wyoolen dii Noéna' xiin xoole'na' loo barkwa'.

<sup>39</sup> Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa.

<sup>40</sup> Kana'n, gana' lle' chop ben' lyixaa, toe' yichi'a na' beena' sto yigaane'.

<sup>41</sup> Na' gana' lle' chop noolə chotgake', toe' yichi'a na' stoe' yigaane'.

<sup>42</sup> 'Daan li se kwas kwezle nad' nak' Xanle, la' bi nezile bi lla bi gor zizaa.

<sup>43</sup> Li shajni'kachi dga, shel' xan yoona' nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'.

<sup>44</sup> Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

*Jempl che wen linka', beena' chon wen na' beena' bi chon wen*

*(Lc. 12:41-48)*

<sup>45</sup> Na' li gak ka to wen llin ben' chajni' na' chone' daa chiyal' gone' na' kat' chza' xane'na' chone' lall' nee lille'na' kwenche wi'e dii yeej gao wen linka' sto gor cheyin.

<sup>46</sup> Chakomba wen llinna' daa chilalile' chone' daa chidolee gone' kat' yillin xane'na'.

<sup>47</sup> La' dii li nia' le', xane'na' gone' lall' nee yog' dii de che'.

<sup>48</sup> Per shi wen llinna' nake' ben' mal na' gakile': "Willaljachkzi xan'na' yilee."

<sup>49</sup> Na' soloe' wit chine' wen linka' nak lall' nee na' yeej gaolene' weezoka'.

50 Na' llana' bi nonyen'le' lez, tokonganz yillin xane'na'.

51 Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaouxaj leye'ka' daa le gakshejlall'gake'.

## 25

### *Jempl che shi bi' nool wew'ka'*

1 'Yel' wñabia' che Chioza' chzaklebin daa gok che shi bi' nool wew' wyaj to wishagna', na' beḡgakb' kandil cheb'ka' jlezgakb' bi' byona' lill noola'.

2 Na' gay'gakb' nteyi na' zi gay'gakb' bi nteyi.

3 Bi'ka' bi nteyi kontele wza'len kandil cheb'ka', per bich beḡgakb' seta' yigaagakba'n.

4 Na' bi'ka' nteyi, beḡgakb' kandil cheb'ka' na' beḡtegakb' seta' yigaagakba'n.

5 Na' bi' wishagna'na' wlle'ib' na' bi' nool wew'ka' chbez gokxwesgakb' na' wtesgakb'.

6 Na' do ka chel besyaa to ben', chi'e: “iBa za' bi' wishagna'na', li sho' lljatilchob'!”

7 Na' wyas bi' nool wew'ka' wzologakb' chiyon-shao' kandil cheb'ka'.

8 Na' bi' nool wew'ka' bi nteyi gollgakb' bi'ka' zi gay': “Li gonḡach neto' lat' set chelena' la' ba chibill chento'ni.”

9 Per bi'ka' noḡ seta' che'gakb': “Bi gonnto'n, kwenche ki iyalljichon ganga. Wenlə li shaj li lljxi' chelena' gana' chiteen.”

10 Na' shlak zejgakb' zjxi'gakb' seta', bllin bi' wishagna'na' na' bi'ka' noḡ seta' wyoolengakb' ben'ka' loo yoona' gana' chak wishagna'na', na'ch wyej puerta'.

11 Na' ka billin bi' nool wew'ka' jxi' seta', wnegakb' xan yoona' che'gakb': "iBen'do', bsalj-gach shoonto!"

12 Per xan yoona' chi'e legakb': "Bi wsalj', la' bi nombi'a le'."

13 Na'ch che' Jesúza' ben'ka':

—Ka'kzə le', chiyal' se kwasle, la' aga nezile bi lla bi gor zizaa.

*Jempl che ben'ka' bgaanlen xmech xane'ka'*

14 'YeI' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

15 'Na' toe' bi'e gayaa mil mech de or, na' stoe' chopo milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'.

16 Na' beena' bi'e gayaa milan, benlene'n llin na' bene' gan zi gayaa milan.

17 Na' lekzka' beena' bi'e chopo milan, benlene'n llin na' bene' gan zi chopo milan.

18 San beena' bi'e to milan, jtene' to yech na' bkwasheen.

19 Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'.

20 Na'ch zigaate beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de zi gayaa mil daa benlana'n gan."

21 Na'che' xane'na'ne': "Le wen beno', to wen llin wen inleeb nako', beno' ka chiyal' gono' kon daa

bkwaanlen' li' lat'. Na' dii xench gon' li' naa. Wyoo kwenche yibalenilo' nad'."

22 Na'ch wdena' bllin wen llinna' bkwaanlene' chopamila, chi'ene': "Xan', ni de de chopamila' beno' nad', na' ni de zi chopamila daa benlena'n gan."

23 Na'ch che' xane'na'ne': "Le wen beno', to wen llin inleeb wen nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."

24 Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' znia, na' to chizi'zo' banez daa chon ben' yoblə."

25 Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n."

26 Na'ch che' xane'na'ne': "Ben' lia, bikz bi llin yejni'alalii chono'. Nezteilo' to chizi'z' banez daa chon ben' yoblə."

27 Na' daa nezilo' kan' chon', berache ki joo xmecha' gana' chon yichjin shlak bi wzoa? Shel' beno' ka', na' naa ba biyed' yiyono'n lente yichjinna', shel'ka'."

28 Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan."

29 La' kan' nakan, beena' chgone' llin daa yoo lo nee, gonche' lall' nee dii xench ax't gat' kwe'chile'; san beena' bi chgone' llin daa yoo lo nee, ax't daa ngoo lo nee lat' yidojo."

30 Na' wen llinni bi yejni'alalii, li wza'lee gana' shgasj shchol, gana' kwellyeshee na' gaouxaj leye'na' daa le gakshejlallee."

*Ka gak kat' wchoglo Jesúza' che ben'*

<sup>31</sup> Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'.

<sup>32</sup> Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'.

<sup>33</sup> Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni.

<sup>34</sup> Na' nad', ben' wñabia', yep' ben'ka' lle' shlaa de shli cha'ni: “Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie yell-liona'.

<sup>35</sup> La' ka wdon', bwaole nad'; na' ka wbilid', benle dii weej'; na' ka wda' ka ben' zit', bleble nad' lill-lena'.

<sup>36</sup> Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'.”

<sup>37</sup> Na' yog' ben' li ben' shao'ka' inagake' nad': “Xan', ¿batran ble'into' li' chdono' na' bwaonto' li'? ¿Batran ble'into' li' chbililo' na' bennto' daa weejo'?

<sup>38</sup> ¿Batran ble'into' li' chdo' ka ben' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' bennto'n?

<sup>39</sup> Na' ¿batran gokbe'into' bi shawoo wa gotoo lillyana' na' bidwianto' li'?”

<sup>40</sup> Na' nad', ben' wñabia', yepgakee: “Dii li nia' le', yog' daa benle che ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan benile ka'.”



41 'Na'ch yep' beṇ'ka' lle' sh<sub>l</sub>aa de robesi: “Li kwās ka'lə, le' wen dii mal. Lo yi' gabi<sub>l</sub>a' daa cha<sub>l</sub>' zej<sub>l</sub>i kaṇi chidol<sub>l</sub>'le yiyajle gana' ba non Chioza' sak'zi' dii xiwaa len anjl cheyinka'.

42 La' ka wdon' bi beṇle dii gaw'; na' ka wbi<sub>l</sub>id' bi beṇle dii yeej'.

43 Na' ka wda' ka beṇ' zit', aga bleble nad' loo yoo lill-le. Na' ka byallj xalaana', aga bi beṇle; na' ka bi shawaa wa gotaa lillyana', aga bidwiale nad'.”

44 Na' inagake' nad': “Xan', ɔbatran wdono', wa wbi<sub>l</sub>ilo', wa wdoo ka beṇ' zit', wa bibi xalaano' got', wa bi shawoo, wa gotoo lillyana' na' bi goklennto' li'?”

45 Na' yepgakee: “Dii li nia' le', daa bi goklenle beṇ'ka' byallj bch<sub>h</sub>ini, beṇ'ka' nak beṇ' bishaa na' beṇ' zan', la'kzi bi nakgake' beṇ' zakii, nad'kzan bi goklenle.”

46 Na' beṇ' malkan' yiyajgake' gana' tegake' yel' sak'zi'na' zej<sub>l</sub>i kaṇi, na' beṇ'ka' nak beṇ' li beṇ' shao' soalengake' nad' zej<sub>l</sub>i kaṇi.

## 26

*Wloogake' xnezin gox'gake' Jesúza'*  
(Mr. 14:1-2; Lc. 22:1-2; Jn. 11:45-53)

1 Na' ka biyoll be' Jesúza' yog' dill'ka', na'ch golle' beṇ'ka' nakgake'ne' txen:

2 —Ba nezkzile zi chop llazan chyallj gal' lni Paskwa', na' nad', Beṇ' Bsel' Chioza' Yell-lioni, gak' lo na' beṇ'ka' witgake' nad' lee yag cruza'.

3 Na'ch bxozka' chn<sub>n</sub>abia' na' beṇ'ka' chli' chsedi leya' na' beṇ' golka' chn<sub>n</sub>abia' beṇ' Israelka' bdop-gake' lill bxoz choo bxoz xenna', beena' le Caifás.

<sup>4</sup> Na' wloogake' x̄nezin gox̄'gake' Jesúza' xochizi, ka ki gakbe'i ben', na' witgake'ne'.

<sup>5</sup> Na' che' ljwelle':

—Bi gox̄'chone' shlak chal' ln̄ina' kwenche bi wta w̄necho ben'.

*To noolə bwazje' set zix̄a'yichj Jesúza'*  
(Mr. 14:3-9; Jn. 12:1-8)

<sup>6</sup> Na' ka zoa Jesúza' Betániana' len ben'ka' nakgake'ne' txen, wyajgake' lill to ben' le' Simón, beena' gok yillwe' daa le lepra.

<sup>7</sup> Na' shlak chi' Jesúza' cho'a mesa', bllin to noolə nox̄ee to lmet de yaj xochi na' yollan set dii chl̄a' zix̄ dii zak' mech xen, na'ch bwazje'n yichj Jesúza'.

<sup>8</sup> Na' ka ble'i ben'ka' nak Jesúza' txen daa ben noola', le bllaagake' na' che' ljwelle':

—¿Biche benditjz beeni seta'?

<sup>9</sup> Shel' bet'chokle'n, la' dii xen zakaan, na' bi'e xmechinna' ben' yesh'ka', shel'ka'.

<sup>10</sup> Na' beni Jesúza' ka choe'gake' dill', na' golle' legake':

—¿Biche ch̄nezle che nooli? La' daa ba bene' cha' nakan dii wen.

<sup>11</sup> Ka nak ben' yesh'ka', toshiizi soagake' lad-jlena', san nad', aga toshiizi soalen' le'.

<sup>12</sup> Daa ba bwazj nooli nad' set zix̄a', bene' ka' kwenche gakshao'zega kwerp cha'ni kat' wk-wash'gake' nad'.

<sup>13</sup> Na' dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingak-ile'ne'.

*Juda' bdie' Jesúza' lo na' bꞑozka' chꞑabia'*

*(Mr. 14:10-11; Lc 22:3-6)*

<sup>14</sup> Na'ch beena' le Jud Scariot, beena' nak txen beꞑ'ka' shllin, wyaje' lao bꞑozka' chꞑabia'.

<sup>15</sup> Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat.

<sup>16</sup> Na'ch lo llana'tez wzolo Juda' chinoe' nakan gone' kwenche gone' Jesúza' lo na' beꞑ'ka'.

*Xꞑancho Jesúza' wdaolene' beꞑ'ka' nakgake'ne' txen xshe'na'*

*(Mr. 14:12-25; Lc. 22:7-23; Jn. 13:21-30; 1 Co. 11:23-26)*

<sup>17</sup> Lla nech che lꞑi Paskwa', llana' chaogake' yetxtila' daa bi nchix levadúrana', beꞑ'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che lꞑi Paskwi?

<sup>18</sup> Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa lia bia' gak che', na' lillo'na' cheenile' wsini'anto' daa gaolennto'ne' xshe' che lꞑi Paskwi.”

<sup>19</sup> Na'ch beꞑ'ka' nakgake'ne' txen bengake' kon ka golle' legake', na' jasini'agake' xshe' che lꞑi Paskwa'.

<sup>20</sup> Na' ka gol, wche'len Jesúza' beꞑ'ka' shllin cho'a mesa'.

<sup>21</sup> Na' shlak chaogake' che' Jesúza' legake':

—Dii li nia' le', tole gonle nad' lo na' beꞑ'ka' chakzi' chakzbani nad'.

<sup>22</sup> Na' ka golle' legake' ka' le gokyesh'gakile' na' to toe' che'gake'ne':

—Xan', ¿anadaan gon' ka', lla?

<sup>23</sup> Na'ch che' Jesúza' legake':

—Beena' ba bleejlene' nad' yetxtil che'na' loo yeena', beena'kzan' gone' nad' lo na' ben'ka' chakzi' chakzbani nad'.

<sup>24</sup> Ka nak nad', Ben' Bsel' Chioza' Yell-lioni, wit ben' nad' kon ka na Cho'a Xtill' Chioza', per jnyesh'laz gak che beena' gone' nad' lo na' ben'ka'! jNaklan wen shel'ka' bi golje'!

<sup>25</sup> Na'ch Juda', beena' wdie' Jesúza' lo na' ben'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

<sup>26</sup> Na' shlak chaogake', bex' Jesúza' yetxtila' na' bi'e Chioza' yel' choxken, na' bxoxje'n na'ch bi'en ben'ka' nakgake'ne' txen, chi'e:

—Li gao dga. Lennan' kwerp cha'ni.

<sup>27</sup> Na'tech bexee to kop dii yoll vino, na' bi'e Chioza' yel' choxken na' bi'en legake', na' golle':

—Yog'le li yeej dga yoll loo kopi,

<sup>28</sup> la' lennan' xchen'na' daa gon ka gak li dii koba' bcheb Chioza' gone'. Na' laljan kwenche yiyakxen saaxya che ben' zan.

<sup>29</sup> Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chnabia' Xa' Chioza', kana'chan yeejlana'n le' dii yoblə.

*Jesúza' chi'e bi wcheb Pédrona' shi nombi'ene'*

*(Mr. 14:26-31; Lc. 22:31-34; Jn. 13:36-38)*

<sup>30</sup> Na' ka bidaogake', belgake' be'la'ogake' Chioza' na'ch biyajgake' lo yaa Olivoza'.

<sup>31</sup> Na' ka ziyajgake', che' Jesúza' legake':

—Yog'le kwey yichjle nad' naanlle'. La' kin na Cho'a Xtill' Chioza': “Wit' beena' chap xil'ka' na' illeshlesgakb.”

<sup>32</sup> Per ka yiban' ladj beṇ' wetka', yiyaa Galileana' lljalez' le'.

<sup>33</sup> Na'ch che' Pédrona'ne':

—La'kzi yog' beṇ'ki kwey yichjgake' li', nad' bi kwey yichj' li'.

<sup>34</sup> Na'ch che' Jesúza'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

<sup>35</sup> Na' Pédrona' chi'ene':

—La'kzi guetlentia' li', biga inia' bi nombi'a li'.

Na' ka'kzə goll yog'lol beṇ'ka' nakgake'ne' txen.

*Jesúza' be'lwille' Chioza' latja' le Getsemani*

(Mr. 14:32-42; Lc. 22:39-46)

<sup>36</sup> Na' ka bllinlen Jesúza' beṇ'ka' nakgake'ne' txen latja' le Getsemani, na'ch golle' legake':

—Nizə li kwe' shlak shaa daa ka'lə llje'lwil' Chioza'.

<sup>37</sup> Na' bchi'e Pédrona' na' chop bish'te xiiṇ Zebedewa', na' wzolo chakyeshile' dii wal inleeb.

<sup>38</sup> Na' golle' legake':

—Axt chaklikazid' lii guettia' daa le chakyeshii yichjlall'dawaani. Li igaaṇ nizə na' bi guesle.

<sup>39</sup> Na' blee legake' zi lat' na' bchek' yichje'na' lo yona' na' be'lwille' Chioza', chi'e:

—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

<sup>40</sup> Na'ch biyaje' gana' lle' beṇ'ka' shon, na' ble'ile' ba chesgake'. Na' golle' Pédrona':

—¿Abikzə bchejlat'gaile la'ch' tgor kwezle nad' bi guesle?

<sup>41</sup> Bi guesle. Li we'llwill Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

<sup>42</sup> Na'ch wyaje' de wchop shii jelwille' Chioza', chi'e:

—Xadawaa, shi ba nakten idil illag' dga, gakkzə ka cheenilo'.

<sup>43</sup> Na' ka billine' dii yoblə lekzka' cheslagake' daa bi wzogakile' bishgala'.

<sup>44</sup> Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'.

<sup>45</sup> Na'ch biyaje' gana' bgaan ben'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'.

<sup>46</sup> Li chas na' li sho'. Ba za' beena' wdie' nad' lo neeka'.

### *Bex'gake' Jesúza'*

*(Mr. 14:43-50; Lc. 22:47-53; Jn. 18:2-11)*

<sup>47</sup> Bilan' yiyoll yee Jesúza' ka' ka bllin Juda' beena' nak txen ben'ka' shllin, nchi'e ben' zan ben'ka' bsel' bxožka' chnabia' len ben' golka' chnabia' ben' Israelka'. Na' nox'gake' no spad na' no yag.

<sup>48</sup> Na' Juda' ba bzajniile' ben'ka' nchi'e nakan gone' wli'e beena' gox'gake', golle': “Kon beena' wnop', len gox'le.”

<sup>49</sup> Na' ka bllinlene' ben'ka' kwit Jesúza', lii wbig'tie' lawe'na' chi'ene':

—ǰChiox ɲaa, maestro!

Na'ch bnope'ne'.

<sup>50</sup> Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te ben'ka' bex'gake' Jesúza'.

<sup>51</sup> Na' ka bex'gake'ne', to beena' nake'ne' txen wleje' spad che'na' na' wdine'n xmos b̄xoz choo b̄xoz xenna', b̄chogtie' t̄laa nague'na'.

<sup>52</sup> Na'ch goll Jesúza'ne':

—Bigooshao' spad cho'na', la' yog' ben'ka' chit-gakile' ben' yesya, lezkka' len guetgakile'.

<sup>53</sup> ǰAchakile bi gak in̄abid' Xa'na' gaklene' nad' na' lii wsel'tie' anjl zan inleeb, shel'ka'?

<sup>54</sup> Per shi ka' gon', ǰnakra gak yillini Cho'a Xtill' Chioza' gana' nan chonan byen gak ki?

<sup>55</sup> Na'ch goll Jesúza' ben'ka' ba nox'gake'ne':

—ǰAchakile' no wban no nad' za'lenzle no spad no yag kwenche gox'le nad'? Yog' lla bli' b̄sedid' ben' loo yoodo'na', ǰbīche bi bex'le nad' shlak bli' b̄sedid' ben' na'?

<sup>56</sup> Per daa chonle ki, chillinin ka na Cho'a Xtill' Chioza' daa bzej dii ben'ka' wdixjee daa golle' legake'.

Na'ch yog'lōl ben'ka' nak Jesúza' txen b̄xonjgake' na' bkwaan'gake' toze'.

*Jwa'gake' Jesúza' lao ben'ka' ch̄nabia' ben' Is-raelka'*

*(Mr. 14:53-65; Lc. 22:54-55, 63-71; Jn. 18:12-14,19-24)*

<sup>57</sup> Na' ben'ka' bex'gake' Jesúza' jwa'gake'ne' lill Caifáza', beena' nak b̄xoz choo b̄xoz xen, na' lille'na' ba ndop nllag ben'ka' chli' ch̄sedi leya' na' ben' golka' ch̄nabia'.

58 Na' Pédróna' janoe' Jesúza' de zit'lə, bllintie' lesh' chyoo che b̄xoz choo b̄xoz xenna' na' jche'lene' ben'ka' chap yoodo'na' kwenche ile'ile' ka gak che Jesúza'.

59 Na' b̄xozka' ch̄nabia' len ben'ka' ch̄nabia' ben' Israelka' wdiljgake' ben' ch̄iljlallee che Jesúza' kwenche wchoglogake' guete'.

60 Na' la'kzi ben' zan ben'ka' biya dii biyiljall'gake' che Jesúza', aga bidili cho'a dill' che'ka', axt ki bllin chop ben'

61 be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shoŋ llazə yiyontia'n dii yoblə.”

62 Na'ch wzolla' b̄xoz choo b̄xoz xenna', golle' Jesúza':

—¿Abikz bi ino' cheyi dga nagake' cho'?

63 Na' Jesúza' bikzə wnie'. Na'ch che' b̄xoz choo b̄xoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

64 Na' goll Jesúza'ne':

—Awe, kan' nakan. Na' lekzka' nia' le', wle'ile nad', Ben' Bsel' Chioza' Yell-lioni, kwi'a shlaa de shli che Chioza', beena' zeelo nap yel' wak choo yel' wak xenna', na' lekzka' ile'ile nad' zizaa ladj bejka' ze xan yabana'.

65 Na'ch bsho' bchez' xa b̄xoz choo b̄xoz xenna'. Na' daa bene' ka', bli'e nan le blee, na' wne:

—¿Kwinle ba benile naz beeni nake' Xiin Chioza'! Bich chyalljicho ben' gao xya che'.

66 ¿Bi ka inale?

Na'ch gollgake'ne':

—Chiyal' guete'.



67 Na'ch bllaa xeneeka' cho'alao Jesúza' na' wdap' wlall'gake'ne'.

68 Na' che'gake'ne':

—Shi lin' Cristona', wnashki non wdap' wlall' li'.

*Pédrona' bi bchebe' shi nombi'e Jesúza'*

*(Mr. 14:66-72; Lc. 22:56-62; Jn. 18:15-18, 25-27)*

69 Na' shlak chak ka', Pédróna' chi'e lesh' chyoona' ka bllin to noolə wen mandad kwite'na' chi'ene':

—Lenon' nako' txen Jesúza', beñ' Galileana'.

70 Na' lao yog' beñ'ka' lle' na', aga bcheb Pédróna' shi nake' Jesúza' txen, na' golle' noola':

—Bi nezid' bin no'.

71 Na' ka ziyaje' cho'a puerta' bizle'i sto beñ' yoblə le' na' chi'e beñ'ka' lle' na':

—Len beenin nake' txen Jesúza', beñ' Nazareta'.

72 Na' lekzka' aga bizcheb Pédróna' shi nake' Jesúza' txen, bzoatie' Chioza' de taschiw, chi'ene':

—Bi nombi'a beena'.

73 Na' gokzə xtit na' jabig' beñ'ka' lle' na' kwit Pédróna' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

74 Na'ch wzolo Pédróna' chone' zña, chi'e:

—¡Dii balkzan nia' bi nombi'ane'! ¡Chioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'.

75 Na'ch jadini Pédróna' daa goll Jesúza'ne': “Shon shii bi wchebo' shi nombi'o nad' ka zi' kwell shikwteza'.” Na'ch biza' Pédróna' chbellyeshee.

## 27

*Jwa'gake' Jesúza' lao Pilátóna'*

*(Mr. 15:1; Lc. 23:1-2; Jn. 18:28-32)*

1 Na' ka wyeeni', yog'lol bꞑozka' chꞑabia' na' ben' golka' chꞑabia' ben' Israelka' bengake' toz dill' witgake' Jesúza'.

2 Na' bꞑhejgake'ne' jwa'gake'ne' lao Pilátona' beena' chꞑabia' gana' mbani Judeana'.

### *Wit Juda'*

3 Juda', beena' bene' Jesúza' lo na' ben'ka', ka gokbe'ile' ba nakan witgake' Jesúza' na' wdao bdi-achgan le'. Na'ch wyaje' lao bꞑozka' chꞑabia' na' lao ben' golka' chꞑabia' jasane' shichoate mech de plata' daa be'gake'ne'.

4 Na' chi'e legake':

—Le malchga ben' daa bdia' to ben' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z nezilo' bin beno'.

5 Na' jaza! Juda' mecha' loo yoodo'na', na' tech jayet kwine' jaloo do yene'.

6 Na' bꞑozka' chꞑabia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

7 Na' be'gake' dill' yizi'gakile' mecha' to yell-lio dii le Yell-lio che Ben' Wen Yes' gana' wk-wash'gake' ben' zit'ka'.

8 Daan axt naanlla yell-liona' len Yell-lio Chen.

9 Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': “Bikaagake' shichoa mech plat daa bꞑhogbia' ben' Israelka' zak' beena'.

10 Na' kon len wxi'gakile' Yell-lio che Ben' Wen Yesaa, kon kana' wna Xancho Chioza' nad'.”

*Bllin Jesúza' lao Pilátona'*  
*(Mr. 15:2-5; Lc. 23:3-5; Jn. 18:33-38)*

11 Ka bllin Jesúza' lao Pilátona', na'ch che' Pilátona'ne':

—¿Alin' beñ' wñabia' che beñ' Israelka'?

Na' che' Jesúza'ne':

—Kan' ba wno'.

12 Na' shlak bñozka' chñabia' na' beñ' golka' chñabia' beñ' Israelka' chaogake' xya che', bibi dill' billi'e legake'.

13 Na'ch goll Pilátona'ne':

—¿Abi chenilo' diika' chaogake' xya cho'?

14 Per Jesúza' ni to diika' chaogake' xya che' ni shcho'a dill' bi billi'e, na' le bibanchgayi Pilátona'.

*Bchoglogake' guet Jesúza'*  
*(Mr. 15:6-20; Lc. 23:13-25; Jn. 18:38-19:16)*

15 Na' beñ' wñabia'na' yooloe' yog' yiz chisane' to beñ' de lillyana' lla lñi Paskwa', kon beena' inab yog' beñ' yell yisane'.

16 Na' de to beñ' lillyana', beñ' le zeyi che' nake' beñ' mal, na' lie' Barrabás.

17 Na' ka ndop nllag beñ' yellka', che' Pilátona' legake':

—¿No beñ'ki cheenile yisan'?, ¿aBarrabáza', awa Jesúzi, beeni nsi'gake' Cristo?

18 Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

19 Shlak chi' Pilátona' gana' chone' yel' joschisa', bsel' xoolo'na' to rson, chi'ene': “Bi gaklebiló' beñ'ka' chao xya che beena', la' aga bi dol' che' de, la' nll'e'yi wñeid' to yel che', na' le bsheban nad'.”

20 Per b̄xozka' ch̄n̄abia' na' beṅ' golka' ch̄n̄abia' beṅ' Israelka' wlooyel'gake' beṅ'ka' lle' lla' na' in̄abgake' yisane' Barrabáza' na' gone' mandad guet Jesúza'.

21 Na' Pilátona' sto shii w̄n̄abile' legake':

—¿No beṅ'ki ch̄op cheenile yisan'?

Na' beṅ'ka' che'gake'ne':

—¡Bisan Barrabáza'!

22 Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'l̄ole' che'gake'ne':

—¡Bdee lee yag cruza'!

23 Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¡Bdee lee yag cruza'!

24 Na' ka gokbe'i Pilátona' bich bi de gone' daa zizikchli ba chaklleshgakile', bene' mandad j̄xi'gake' nisa' kwenche binee lao yog' beṅ'ka', na' chi'e:

—Aga bi dol' nap' nad' daa guet beeni. Len' gak xbag'lene'.

25 Na' yog'l̄ol̄ beṅ'ka' che'gake'ne':

—¡Neto' len xiiṅnto'ka' idobinto'ne'!

26 Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

27 Na' soldadka' b̄che'gake' Jesúza' gana' chon Pilátona' yel' jos̄chisa' na' biti'agake' yog'l̄ol̄ soldadka' nakgake' txen.

28 Na'ch wdingake' xa Jesúza' na' bwakwgake'ne' to lech' x̄na ka che to beṅ' w̄n̄abia'.

29 Na' bengake' to bxoön de xis yesh' na' bllingake'n yichje'na' ka to corona, na' nee de shlina' bgox'gake'ne' to bar. Na'ch bçhek' xibe'ka' lawe'na' na' btitjgakile'ne' che'gake':

—¡Toshiizi sechgayi che beeni chñabia' beñ' Israelka'!

30 Na'ch no chlla' xeneeka' le', no chikaagake' bara' daa bgox'gake'ne' na' chyíngake'n yichje'na'.

31 Na' ka wde btitjgakile'ne' na'ch biyíngake' lechaa bwakwgake'ne' na' biwakwgake' xe'na' nakwkze'. Na'ch bçhe'gake'ne' kwenche wda'gake'ne' lee yag cruza'.

*Bda'gake' Jesúza' lee yag cruza'*

*(Mr. 15:21-32; Lc. 23:26-43; Jn. 19:17-27)*

32 Na' ka ba chchejgake' cho'a yell Jerusalénna', billaggake' to beñ' Cirene, beñ' le Simón, na' bengake' byen bi'e yag cruz che Jesúza'.

33 Na' ka' bllingake' latja' le Gólgota, na' zejin Latj che llit yichj beñ' wet.

34 Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

35 Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yidol' xa Jesúza'.

36 Na'tech wche'gake' wdapgake'ne'.

37 Na' yichj yag cruz che'na' bda'gake' to dii choe'n dill' biche nda'gake'ne' na', na' nan: “Beenin Jesúza', beñ' wñabia' che beñ' Israelka'.”

38 Na' lekzka' bda'gake' chop beñ' wban shlaa wej kwit yag cruz che Jesúza'.

39 Na' beñ'ka' chde gana' dee, chta yichje'ka' na' chgoogake'ne' belban,

40 che'gake'ne':

—Li' wno' yichinjo' yoodo'na' na' shon llazə yiy-ontio'n, ɨbɨsla kwino' lee yag cruzi shi leilo' nako' Xiin Chios!

41 Na' lekzka' bɨozka' chnabia' na' ben'ka' chli' chsedi leya', na' fariseoka' len ben' golka' chnabia' btitjgakile'ne', che' ljwelle':

42 —Gok bisle' ben' yoblə per bi chak yisla kwine'. Shi leile' len' ben' wɨnabia' chechona', cho' ben' Israel, yiyetjshkile' lee yag cruza' naa kwenche shajle'cho che'.

43 Nɨenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

44 Na' axt wbanka' da' lee yag cruza' kwite'na' lekzka' biya dii che'gake'ne'.

*Wit Jesúza'*

*(Mr. 15:33-41; Lc. 23:44-49; Jn. 19:28-30)*

45 Na' do ka gobill kat' biɨhoɨ doxen yell-lioni axt do ka chida shonch biyeeni'.

46 Na' do ka chida shonə besyaa Jesúza' zilljə, ne':

—Elí, Elí, ɨlama sabactani? —na' zejin: Chios cha', Chios cha', ɨbiɨche ba wlej yichjzo' nad'?

47 Na' bal ben'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

48 Na' toe' lii zejdotie' jxi'e to dii bleeje' loo vino daa nak zichj zla', na'ch bzoe'n to lo xis na' jazoe'n cho'a Jesúza' kwenche yeeje'n.

49 Na' ben'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

50 Na' ka biyoll besyaa Jesúza' zilljə dii yoblə, na' wite'.

51 Na' ka wite', lechaa ze loo yoodo'na' lii bchez'ten gokan choplə. Na' gok to bedxo' na' wlaa yajka'. 52 Na' lekzka' ax̄t biyalj gana' bgash' beṇ' wetka'. Na' zan beṇ' wetka', beṇ'ka' beṇ'liḷall' Chioza', bibangake' sto shii

53 na' bichejgake' gana' bgash'gake'. Na' ka bibanch Jesúza', biyoogake' yell Jerusalénna', na' beṇ' zan ble'gakile' legake'.

54 Na' x̄an soldadka' len beṇ'ka' chaplene' Jesúza' le bblebgake' ka wxo' na' bichlə diika' gok. Na' wṇagake':

—Dii likzan Xiin Chios beeni.

55 Na' zan noolka' wno Jesúza' dezd gana' mbani Galileana', beṇ'ka' goklengake'ne' che bi dii byalljile', lle'gake' de zit'lə bwiagake' doxen ka gok.

56 Na' ladje'ka' len María, beṇ' yell Magdálana', na' María beena' nak x̄na' Jacóbona' len Joséna', na' x̄na' beṇ'ka' nak xiin Zebedewa'.

### *Bkwash'gake' Jesúza'*

*(Mr. 15:42-47; Lc. 23:50-56; Jn. 19:38-42)*

57 Na' ka chzeles yela' bllin to beṇ' wni'a lie' José, beena' nak beṇ' yell Arimatea na' goke' txen Jesúza'.

58 Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'.

59 Na' bikaa Joséna' kwerp che Jesúza' na' bitobe'ne' to lech' xtil.

60 Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee.

61 Na' María, beṇ' yell Magdálana', len Maríana' sto wche'gake' cho'a bana'.

*Beṇ'ka' wdap cho'a ba che Jesúza'*

62 Na' betiyo, llana' chombaṇ beṇ' Israelka', wyaj bḫozka' chṇabia' len fariseoka' lao Pilátona',

63 che'gake'ne':

—Beṇ'do', ba jadininto' ka wna dii beṇ' wxiye'na' kana' mbane', wne' yiyon̄ lla yibane' dii yoblə ladj beṇ' wetka'.

64 Na' bseḷ'gach beṇ' lljtape' gana' bkwash'gake'ne' aḫt ka gakch shon̄ lla kwenche bi shaj beṇ'ka' nakgake'ne' txen do wal̄ chel lljalejgake' kwerp che'na', na' tena' ye'gake' beṇ': “Ba bibane' dii yoblə ladj beṇ' wetka'.” La' shi ba bengake' ka', na'ch gongake' to dii wxiye' walch aga ka dii necha'.

65 Na'ch che' Pilátona' ḷegake':

—Na' lle' soldadka', ḷi wche'gake' kwenche gap-gake'n aḫt ga zeelo gakgake'.

66 Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

## 28

*Biban Jesúza' ladj beṇ' wetka'*

*(Mr. 16:1-8; Lc. 24:1-12; Jn. 20:1-10)*

1 Na' ka wde lla sabda', llana' chombaṅgake', ni baḷ lla nech che xman̄na' sto, wyaj María nool Magdálana', len Maríana' sto jawiagake' cho'a bana'.



<sup>2</sup> Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' wllie' lawinna'.

<sup>3</sup> Na' anjla' chey cheeni'e kakzə ga chep yes na' xe'na' nakan xtil inlleb.

<sup>4</sup> Na' ka ble'i soldadka' le' axt bxiztitgake' daa le bllebake' na' axt witgake' shlet.

<sup>5</sup> Na'ch che' anjla' noolka':

—Bi illeble. Nejid' Jesúzan' chiyiljle, beena' wit lee yag cruza'.

<sup>6</sup> Koch no de ni. Ba bibane' kon ka wne'. Li dakachi wwiale gani wdixjgake'ne'.

<sup>7</sup> Na' li yiyajdo li lljayell beñ'ka' nakgake'ne' txen: “Ba bibane' ladj beñ' wetka' na' ba ziyaje' Galileana' lljaleze' le', na' na'kzə ile'ilene'.” Na' ba wnia' le' ka'.

<sup>8</sup> Na'ch biza'do noolka' cho'a bana' chllebgake' na' le chibagakile' zjadixje'gakile' beñ'ka' nak Jesúza' txen daa goll anjla' legake'.

<sup>9</sup> Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ni'ena' be'la'ogake'ne'.

<sup>10</sup> Na' che' Jesúza' legake':

—Bi illeble. Li lljayell beñ' bishaaka' shajgake' Galileana' na' ile'gakile' nad' na'.

*Wxi' laxj soldadka' kwenche bi we'gake' dill' biban Jesúza'*

<sup>11</sup> Na' ka biza' noolka', bal soldadka' wdap gana' bkwash'gake' Jesúza' biyajgake' yell Jerusalenna' jayellgake' bxozka' chñabia' yog' diika' gok.

<sup>12</sup> Na'ch wyaj b̄xozka' ch̄n̄abia' je'lengake' beñ' golka' ch̄n̄abia' dill' nakl̄ə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen,

<sup>13</sup> che'gake':

—In̄atezle wal chel shlak chesle, beñ'ka' nak Jesúza' txen bidlejgake' kwerp che'na'.

<sup>14</sup> Na' shi ba biñezi Pilátona' dga, neto'kzə lljaza-niinto'ne' nakan gok kwenche bibi gonile' le'.

<sup>15</sup> Na'ch soldadka' beḡ'gake' mecha' na' biza'gake' jazegake'n dill' kon ka gollgake' legake'. Na' axt ñaanlla beñ' Israelka' ni nagake' ka'.

*Jesúza' golle' legake' we'gake' xtilleena' doxen yell-lioni*

*(Mr. 16:14-18; Lc. 24:36-49; Jn. 20:19-23)*

<sup>16</sup> Na' wyaj beñ'ka' shnej, beñ'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'.

<sup>17</sup> Na' ka ble'gakile' Jesúza', be'la'ogake'ne', per balgake' gokchoplall'gake'.

<sup>18</sup> Na'ch jabig' Jesúza' kwite'ka', chi'e legake':

—Ba non Chioza' lo na' in̄abi'a yabana' na' yell-lioni.

<sup>19</sup> Daan, li shaj doxen yell-lioni, li lljali' lljasedi yog' beñ' kwenche gakgake' nad' txen. Na' wchoale legake' nis daa ba nonlilall'gake' X̄acho Chioza', na' nad', Xiine', len Espíritu Sántona'.

<sup>20</sup> Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

**Dill' wen dill' Kob Che Jesucristona'  
New Testament in Zapotec, Cajonos (MX:zad:Zapotec,  
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Cajonos

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
f98bf0c8-4467-559d-82ab-96644a44d38f